

НУРУЛЛОҲ ДОСТОН

ФАСЛИ ИШҚ

(Шеърлар ва ғазаллар)

«MERIYUS»
Тошкент-2013

УДК: 821.161.1-1

ББК: 84 (5Ў)7 -

Д-74

Достон, Нуруллоҳ

Фасли ипқ: шеърлар ва ғазаллар/ Н.Достон. -
Тошкент: MERIYUS, 2013. - 96 б.

Нуруллоҳ Достон (Нурулло Остонов) 1991 йилдан Ўзбекистон Ёзувчилар уюшмаси аъзоси, "Юлдузлар чақнаган тун", "Баҳор рақси", "Йўлдаги булоқ", "Юрагимнинг безовта гули", "Қадим йўлларда", "Осмон тўла фаришта", "Фасли кужлам", "Тонгга пешвоз чиқайлик", "Кўрқмас улоқча" номли шеърлар тўғламларининг муаллифи

© Нуруллоҳ Достон (Н.Остонов)
ISBN 978-9943-395-69-5 © MERIYUS нашриёти

АНБАРАФШОНИМ ВАТАН

Ўтди қанча замонлар, қанча давру давронлар,
Кездим турфа жаҳонлар, жонга жононим Ватан.

Бағри баҳорга монанд, тупроғи зарга монанд,
Оби кавсарга монанд Сир, Зарафшоним Ватан.

Онам каби ғамгусор, отам каби хокисор,
Осмонлари беғубор жаннатмаконим Ватан.

Ўзинг пушти-паноҳим, топган меҳригиёҳим,
Муқаддас саждагоҳим, рўйи жаҳоним Ватан.

Равзаи жаннат ўзинг, Каъбаи зийнат ўзинг,
Рўшнои давлат ўзинг, булбулзабоним Ватан.

Дилга офтобдир васлинг, элга меҳробдир наслинг,
Танти авлоддир аслинг, меҳри равоним Ватан.

Ўзбекнинг нишонаси, ёруғдир пешонаси,
БМТ кошонаси тахтиравоним Ватан.

"Шашмақом" мақомлари, сураъи каломлари,
Салламно саломлари, илму иймоним Ватан.

Ёғди кўп бало тоши, ёвдан омондир боши,
Минг асрлар бардоши, марду майдоним Ватан.

Ота макон, она юрт, тупроғини кўзга сурт,
Фурбат эрур ўзга юрт, томримда қоним Ватан.

Киндик қоним тўқилган, мингта жоним тикилган,
Байроқ тутиб йиқилган садқадир жоним Ватан.

Истиқдолни эъзоз қил, Ҳумо қуши парвоз қил,
Муборак йигирма йил, ҳур жовидоним Ватан.

Эшигинг нурга тўлсин, бешигинг гулга тўлсин,
Ҳур қизу улга тўлсин, анбарафшоним Ватан.

Нуруллоҳ, бир куйчиман, тўйлаган бир тўйчиман,
Ўз элимдан элчиман, Ўзбекистоним Ватан!

КАЛОМ

Ўзинг қўлла Ҳаққи комил, мадад қил,
Уммон аро сабру дилни садаф қил.
Рушди ҳикмат, ҳидоятга шараф қил,
Аҳли фосиқ, ёмонни бир тараф қил
Ҳар бало-ю ҳар қазони даф қил.

Ўзинг қўлла Ҳаққи комил, мадад қил,
Жамолингни кўкда моҳи ражаб қил.
Аъмоли баъд, ғанимларга ғазаб қил,
Ажру амал оташида азоб қил,
Ҳар бало-ю ҳар қазони даф қил.

Ўзинг қўлла Ҳаққи комил, мадад қил.
Аҳли ишққа шарму ҳаё либос қил.
Калима-и шаҳодатни асос қил,
Яхшилиқни ёмонлиқдан халос қил
Ҳар бало-ю ҳар қазони даф қил.

ЧУМОЛИ

Нафси олғир ҳаволидан кўрқ.
Дўсти чоғир аъмолидан кўрқ,
Нуҳ тўфони мавжидан кўрқма,
Феъли собир заволидан кўрқ.

Тулки-шоқол, бўридан кўрқма,
Ҳайвонларнинг зўридан кўрқма,

Одамзоднинг ўридан қўрқма,
Тирикликнинг уволидан қўрқ.

Билки, ота-она келар мўрт,
Гарди пойин қўзларингга сурт,
Қорачиқда омон қолган юрт -
Ёғийларнинг таловидан қўрқ.

Алломалар ришгаси чироқ
Фоҳишалар ишваси тузоқ,
Яқинларнинг фитнаси яроқ,
Миннат аҳли паловидан қўрқ.

Огир ўт-сув, тухмат балоси,
Устихонни ўртар жафоси,
Охиратда бўлур жазоси,
Рўзи маҳшар саволидан қўрқ.

Дунё ҳеч вақт бўлмаган тўкис,
Гоҳ тиг урган, гоҳида бигиз,
Бахт ва кулфат ҳамиша эгиз,
Хиёнатнинг шамолидан қўрқ.

Жасадингни титар нимталаб,
Гўрингдан ҳам кетар елкалаб,
Ватанингни сотар тилқалаб,
Талагувчи чумолидан қўрқ.

САНО

Ғунча яноғида шудрингми-нурми,
Кўклам ёғдусига чайилган юзи.
Нафис шаббодалар тортқилар ҳурни -
Баҳор - табиатнинг ораста қизи.

Куйлаб юборади кекса мажнунтол,
Соғинч тирқирайди кўйлақларида.
Муҳаббат уйғонар, уйғонар висол,
Лайлақлар тўқиган турмақларида.

Чапани байталлар чорлар жуфтини,
Чўпон чопонида чучмома атри,
Танти табиатнинг кўринг лутфини,
Алвондай чўғланар қуёшнинг сатри.

Қайтадан бошланар ҳамал ҳисоби,
Тупроққа жон берар, тирикка тузим.
Боғларда гуркирар баҳор хитоби,
Қушлар сано ўқир, гулларда таъзим.

БИЛДИРМАЙГИНА

Юрагимни эзма найгина,
Фамларингни нурга чайгина,
Таскин берар оғу - майгина -
Кунлар ўтар билдирмайгина.

Болалигим - қизгалдоқ умрим,
Бийрон қушим - овунчоқ кумрим,
Гиёҳларга сочилган шудринг -
Ойлар ўтар билдирмайгина.

Унутилар қайноқ бўсалар,
Дилни тилар ширин ғуссалар,
Чўкиб борар полвон жуссалар,
Йиллар ўтар билдирмайгина.

Қайнайверар қуёш қумғони,
Ураверар юрак сандони,
Қийнайверар ҳаёт зиндони,
Йиллар ўтар билдирмайгина.

Тизни букиб гул япроғига,
Сажда қилиб юрт тупроғига,
Тафтни босиб дил қақроғига
Умр ўтар билдирмайгина.

Мажнун умрим лайлатулқадр,
Лайли бўлди тўлин ой - бадр,
Фунчалади руҳимда сабр.
Умр ўтар билдирмайгина.

Ҳаёт шундай сирли мўъжиза,
Тиз чўкканни қилади изза,
Алл турсанг, уради тизза
Умр утар билдирмайгина.

Улғаямиз тилло бешикда.
Ўрганамиз қўлга мушукдай,
Кетаямиз чўбин эшикдан
Умр ўтар билдирмайгина.

ТИНМАС

Муҳаббат оғриқми, тузалиб кетса,
Муҳаббат риштами, узилиб кетса.
Ёки келинчакми, сузилиб ўтса-
Қалбимда тугёнлар садоси тинмас,
Кўнглимда ҳижронлар дарёси тинмас.

Ҳар тонг деразамдан иффор келади,
Мени соғинтирган баҳор келади,
Ойдаи тўлиб ул ёр, дилдор келади,
Қалбимда кўкларлар сабоси тинмас,
Кўнглимда армонлар навоси тинмас.

Севги саҳросида ташна булоқман,
Қанча яқинлашсам, шунча йироқман,
Кечиб кетолмадим ғамза фироқдан,
Қалбимда Карбало саҳроси тинмас,
Кўнглимда айрилиқ жафоси тинмас.

Ўзим гуноҳқорман, кўпдир гуноҳим,
Ўзинг ишқ бергансан, қўлла Илоҳим,
Менинг ҳаётимсан, танҳо паноҳим,

Қалбимда муҳаббат нидоси тинмас,
Кўнглимда булбули гўёси тинмас.

ТОЗА ГУЛ

Сен бокира, бир тоза гулсан,
Кипригингга гўбор қўнмаган,
Очилади чечаклар, кулсанг,
Лабларингда қуёш ўйнаган.

Сочларингнинг занжири афсун,
Сехрлади телба ҳушимни,
Айт, кўзларинг бунчалар маҳзун,
Ўқиётир менинг ҳукмимни.

Қошларингнинг қалдирғочига,
Банди бўлди бандан машраб,
Мени осгил ишқ оғочига.
Жасадимни кетмагил ташлаб.

Ситорангда ҳаё гулхани,
Қизғалдоқлар ёнар тафтидан.
Гулзор қани, аё, гул қани,
Адаштирди жунун афтидан.

Мақтовларим ҳали ичимда,
Бунча куркам, зеби фалаксан.
Ўн саккиз минг олам ичинда,
Ўзинг танҳо ҳуру малаксан.

ИШҚИ ИЛОҲИЙ

Сарвари оламга келганда ваҳий,
Ҳазрати пайғамбар бўлди салоҳий,
Бешиқдан тобутга қадар ҳикмат шу-
Тириклик фасли ишқ, ишқи илоҳий.

Етишиб бормоқда умр поёнга
Келиб кетмоқдамиз қайдин қаёнга?

Фақат бир ҳақиқат ўхшар аёнга-
Тириклик фасли ишқ, ишқи илоҳий.

Хулоса қилмадинг шунча йил яшаб,
Амалга талпиндинг қалтираб-қақшаб,
Қадрингни билмадинг одамга ўхшаб,
Тириклик фасли ишқ, ишқи илоҳий.

Макрдан иборат илму амалинг,
Шайтоннинг сабоғи бўлди тамалинг,
Тушуниб етмадинг кетар маҳалинг,
Тириклик фасли ишқ, ишқи илоҳий.

Фанода фақир бўл, эл меҳрибони,
Муҳтождан аяма бир бурда нонни,
Англагил топширсанг омонат жонни-
Тириклик фасли ишқ, ишқи илоҳий.

МЕЗОН

Адоват сақламас одам вазмини,
Шайтон қиздиради нодон базмини,
Сўрови бўлар ҳар луқманг ҳазмини.
Ўткинчи ҳаваслар қурбони бўлма.

Шоҳ бўлсанг, раият шафқатини қил,
Магарким гадосан, меъёр-ҳадни бил,
Ортиқча сўзлама, гўрга тикар тил
Ўткинчи ҳаваслар қурбони бўлма.

Фараз қил - замин уй, сен унда меҳмон,
Келишдан мақсад йўқ, на кетиш аён,
Йўлингни тўсади учраган ҳайвон
Ўткинчи ҳаваслар қурбони бўлма.

Баъзида ҳақ сўзинг тухматдан ўтар,
Баъзида рост гапинг фитнадан баттар,
Фақат қуллар тутган байроқни кўтар,
Ўткинчи ҳаваслар қурбони бўлма.

Беҳуда талашма, тирашма тентак,
Йўлингда дуч келса, уч-тўртга эшшак,
Сафига қўшади, ҳанграсанг гартак
Ўткинчи ҳаваслар қурбони бўлма.

ТАҚДИР

Бешафқат кунларнинг ўтгани шудир,
Гоҳида оғу-бол тутгани шудир.
Кеча қиш ҳукмида бўлган боғларда
Бугун куртакларнинг бўртгани шудир.

Ўтади беғубор болалик шодон,
Ишвали кулади гул ҳаёт хандон.
Улғайиб бўламиз доно-ю нодон,
Карвоннинг манзилга йўртгани шудир.

Гуноҳга ботамиз азалдан бир-бир,
Иймонни сотамиз амал деб бир-бир,
Дўстларни отамиз шул дея тақдир,
Тегрангда ёлғоннинг урчгани шудир

Ўрганиб қоласан мақтов-олқишга,
Фурсатинг етмайди ортга боқишга,
Киришиб кетасан ёппа сотишга,
Шайтоннинг иймонни ютгани шудир.

Яшайсан алдовга жонни қантариб,
Аюҳаннос соласан инсоф ахтариб,
Ўзингни тутасан хокисор, ғариб,
Тақдирнинг толеъга битгани шудир.

Ўзингдан зўр чиқса, мақтаб ёғладинг,
Ожизни доғладинг, дилни чоғладинг,
Қурбонинг бошида белни боғладинг,
Будундан диёнат кетгани шудир.

Ғафлатда яшадинг, ғофил тўрасан,
Бесамау умрингга қотил жўрасан,
Экканинг гуллади. ҳосил ўрасан,
Тақдир манглайингга битгани шудир.

ХУДПАРАСТ

Бўлиссан, тўрасан. олий мартабанг,
Билмадим, қай узлат сиғинган қаъбанг,
Шайтоннинг макрига ўхшайди сажданг
Бандани хўрлашга Худо эмассан.

Беибо жабрингдан кимса қадри хор,
Ҳар гуноҳ савабга Ҳақнинг ажри бор.
Амалнинг пойида бўлдинг мардикор,
Бандани хўрлашга Худо эмассан.

Мардга тўн тор келмас ўлчанса бичим,
Оқил ҳар амалга топади ечим,
Сузишни билмасанг ғарқ айлар кечим
Бандани хўрлашга Худо эмассан.

Дунё покланмаса кибр, миннатдан,
Жудолашиб борар турфа зийнатдан
Бекор қувилмади шайтон жаннатдан,
Бандани хўрлашга Худо эмассан.

Замин чархпалакдир, карвон тийилмас,
Инсон тирик бўлса, ризқи қийилмас,
Сабр нимкосаси бекор ейилмас,
Бандани хўрлашга Худо эмассан.

Бунча худпарастсан, бунча майдасан,
Оёгинг қайда-ю, ўзинг қайдасан,
Элнинг назаридан қолган бандасан,
Бандани хўрлашга Худо эмассан.

ТАВБА

Тақдирнинг ҳукмидан қутулмоқ душвор,
Измида синайди ҳар фақир, бийни.
Хўроз қичқирмасдан дўстлари уч бор,
Сотишга улгурди Исо Салбийни.

Ҳаёт посангиси холис тарози,
Бир енгил келасан, бир тош босасан.
Бирда қотил бўлсанг, бирида қози,
Бирда осиласан, бирда осасан.

Ўзингни синасанг амал қўшқида,
Эшшак бозорига даллол бўлиб кўр.
Иймонни сотарлар уч пул ишқида,
Уларнинг сафида ҳалол бўлиб кўр.

Қара, атроф тўла издиҳом тўпи,
Елкалаб кетмоқда аччиқ қисматин.
Ваҳдату сийратдан мосуво кўли,
Бажариб ўтади шайтон хизматин.

Қиёмат ҳукмини англамас банда,
Иймонни сотади ажал дамида,
Тавбага келмайди жон чиқар дамда,
Дўзахга кетади тўнғиз қавмида.

МЎЛТОНИЛАР

Фойдасидан кўпдир зиёни,
Найрангининг йўқдир поёни.
Билмас номус, шарму ҳаёни,
Мўлтонилар бузар дунёни.

Эшигингдан кирар бостириб,
Чўнгагингни қоқлар ғоз туриб.
Турли найранг топар ром кўриб,
Мўлтонилар бузар дунёни.

Ҳақ бор жойда адолат қолиб
Бир бад касри мингни ўртайди.
Мўлтонилар бир четда қолиб,
Мўлтонилик қилгич кўпайди.

Барча билан топишади тил,
Орасидан ўтмас гарчи қил.
Англамайсан - гапи чин-ҳазил
Мўлтонилик қилгич кўпайди.

Кўрсанг ўзи хокисор етим,
Ҳар макрига топади ечим.
Шайтон билан тузади битим
Мўлтонилар бузар дунёни.

Заҳри қаттол, ширин забони,
Ўйнатади Одам Атони,
Элда қилар оби-ҳавони
Мўлтонилар бузар дунёни.

Усиз ўтмас ҳеч бир маросим,
Ҳар кимсага ўтказар босим,
Вужудига ёвуз руҳ ҳоким
Мўлтонилар бузар дунёни.

НАФАС

Умрнинг сайёди тортилган милда,
Тириклик ўлчови омонат қилда.
Олган ҳар нафасни сўнгги дам билда
Ўтган ҳар дамнингни сўнгги нафас бил.

Одамга тил берди Яздони олам,
Барча жонзодларни қилди мусаллам.
Келмоғу-кетмоқни қилди хат-қалам
Ўтган ҳар дамнингни сўнгги нафас бил.

Ҳей, инсоф кўчаси қайда, билмаган,
Нафсига эрк бериб, назри илмаган.

Иймондан лоф уриб, эҳсон қилмаган,
Ўтган ҳар дамнингни сўнгги нафас бил.

Бировда мол бисёр, бировда бахт йўқ,
Бировда тожу-тахт, бировда вақт йўқ,
Бировда насия, бировда нақд йўқ,
Ўтган ҳар дамнингни сўнгги нафас бил.

Умр-ку ўтади жангу жадалда,
Гоҳ виждон қамалда, гоҳ жон қамалда.
Худони танимас нокас амалда
Ўтган ҳар дамнингни сўнгги нафас бил.

Улусда бурд қочар иғво-низодан,
Ноҳақ жабрдан қўрқ, бевақт қазодан.
Ҳеч кимса қутилмас одил жазодан,
Ўтган ҳар дамнингни сўнгги нафас бил.

Кимки арконини фарзи илм этур,
Риёзат, сабр ила сайқалга етур.
Илму амал, шойиста хулқ. дўст зухур-
Ўтган ҳар дамнингни сўнгги нафас бил.

* * *

Жисму танни руҳи жонга қафас бил.
Маърифатга нафси жоҳни абас бил.
Ҳар бандага Яратгандин мадад бор,
Фанимат ҳар дамни сўнгги нафас бил.

Тугал бўлди Тангри амри-ла олам,
Халиф ўлди анга Ҳазрати Одам.
Манглайингда нури Худо мужассам,
Фанимат ҳар дамни сўнгги нафас бил.

Тариқатга етар банда сидқ ила,
Шариятга амал қилгай фикҳ ила.
Мақомотга кимса етмас тиф ила,
Фанимат ҳар дамни сўнгги нафас бил.

Тариқатдир нафас, қадам ул-карам,
Сукут айла, бўлар-бўлмас урма дам.
Зино қилма, ҳалол ишла, бўлма кам
Фанимат ҳар дамни сўнгги нафас бил.

Мақомотда зоҳиран тавба қилгил,
Дилни покла, ботинан тавба қилгил.
Файри шаръий корини канда қилгил
Фанимат ҳар дамни сўнгги нафас бил.

Нафси амморага айлагил жиҳод,
Сабр бирла мақсуду ҳосил мурад.
Қилгил иймон манзилига эътиқод
Фанимат ҳар дамни сўнгги нафас бил.

Маърифатни тариқат ахлоқи бил,
Сидқ, саховат, тафаккур кўргони бил.
Таваккул қил, ишончинг сорбони бўл.
Фанимат ҳар дамни сўнгги нафас бил.

ЖУНУН МАНЗИЛИ

Ховучлаб ичади кўзларинг ғамни,
Қимтилган лабларда гуноҳнинг муҳри.
Жунун манзилида аврар одамни
Таъқиқланган жаннат гулининг зуҳри.

Уят-андишанинг ночор жомаси,
Илон авраётган афсунгар дами.
Ширин таъқиқдаги жаннат олмаси -
Руҳга бўйсунмаган муҳаббат таъми.

Ҳаёдан тўлғаниб титрайди туғён,
Чанқовуз лабида оҳанг жилваси.
Ишқ оғу шароби, ғафлатдан уйғон,
Диндан чиқаради шайтон ҳийласи.

Бўсага шайланган мажнунтол каби,
Вужудни эркалар жаннат қушлари.
Ўпиб ўлдиради энди ёр лаби,
Бошингда янчилар таъна тошлари.

Тонгда очиласан намозшомгулдай,
Кўзларинг эслатар рақси самони.
Тиланчи авайлаб санаган пулдай-
Садақа қилинган жаннат таоми.

Яна беҳуш қилар беҳишт атридан,
Пешвоз чиқаётган тақдир висоли.
Ўрганиб яшайсан шайтон макридан,
Жаннатдан қувилган одам мисоли.

МАНГУ ИШҚ

Фуссалардан йиллар улғайди,
Ой чехралар гулдай сарғайди,
Ўжар юрак иқроп бўлмайди,
Яна сени кўргим келади!

Наво ўтди, бенаво ўтди,
Ўртамиздан бир дунё ўтди,
Тан олмадик, не хато ўтди,
Ҳамон сени кўргим келади!

Фунчаларнинг лабида ҳайрат,
Энтиктирар қушчалар сайраб,
Келдим шунча ўзимни алдаб,
Нетай, сени кўргим келади!

Шалаббодир ёмғир кўйлаги,
Кучоқлайди чақмоқ билагги,
Оқ кўйлакли баҳор малаги,
Сени жуда кўргим келади.

Вақт туташди эшигимизда,
Соғинч қолган бешигимизда,

Мангу ишқ бор қўшиғимизда,
Сени жуда кўргим келади!

ВАТАН ШАЪНИ

Ватан, боболардан мерос каломим,
Ёнарсўз лайғомим, мозий карвоним,
Сенсиз мен қуёшсиз, нурсиз гиёҳман
Тилга кирармиди тилсиз забоним.

Ватан, ўланларинг рақсида туғман,
Алвон гиламларинг кўксида чўғман.

Мевали дарахтсан, йўқ тош отмаган,
Бўғзингга осилар сотган-сотмаган,
Шунчалар бағрикенг, осмон ҳимматинг,
Гарчанд чандиқларинг изи қотмаган.

Бешикларинг турфа гулларга тўлсин,
Эшикларинг қизу улларга тўлсин.

Дунё баҳра олди илм-ирфонингдан,
Кўзим қувонади шаъну шонингдан.
Машириқдан мағрибга қадар овозанг,
Оврупага ўрин бердинг ёнингдан.

Саҳрода ташнага сув бермоқ савоб,
Қуёш остонангда қилади тавоб.

Осмондан узилиб тушган жаннатсан,
Бошларга ёғилиб турган раҳматсан.
Пайғамбар назари тушган қадим юрт,
Сабрдан тикланган улуғ давлатсан.

Лойсувоқ уйларинг иймон бешиги,
Ҳар битта алломанг дунё эшиги.

Ялласиз гўшанг йўқ, алласиз уйинг,
Хислатсиз решанг йўқ, ~~боласиз тўйинг.~~

Муқаддас саждагоҳ, кўнгил жавҳари
Туғингда порласин юлдузинг, оинг.

Элни тарк этмасин қут-баракалар,
Сенга муборақдир тўй-маъракалар.

БАЛДАИ МАҲФУЗА

Зардушт, сўғддан сўйлаган овозаси,
Осмонларга бўйлаган ҳавозаси,
Дўстга очиқ жаннатий дарвозаси,
Аҳли илм меҳроби афрўзаси,
Ганжи замин балдаи маҳфузаси.

Дин арабда, Туркистонда амали,
Илм ажамда, Самарқандда тамали,
Тўрт фаслни тенг қилади ҳамали,
Боғи Бўлдо, Кўҳаку Ферузаси,
Ганжи замин балдаи маҳфузаси.

Манглайида нури Худо жилоси,
Етти иқлим таърифида қиёси,
Ҳар гиштида алломалар дуоси,
Ҳар минори, қалъасию кўзаси,
Ганжи замин балдаи маҳфузаси.

Етти шаҳар хоки ниҳон сабрида,
Ҳарбу зарби, жабри аён қаҳрида,
Келажакнинг тонги лисон бағрида,
Афросиёб, Кониғил марғубаси,
Ганжи замин балдаи маҳфузаси.

Қадим карвон зунноридир Самарқанд,
Аҳли иймон рафторидир Самарқанд,
Дўсту меҳмон дийдоридир Самарқанд,
Моҳитобон равзаи афрўзаси,
Ганжи замин балдаи маҳфузаси.

УЛУҒ ЮРТ

Кипригимнинг найзаси камон,
Бўй чўзган ҳар майсаси қалқон,
Қон томири, найчаси дармон,
Фарзандлари баркамол Ватан,
Сарҳадлари безавол Ватан.

Ўзбекнинг шўр пешонасига,
Паноҳ бўлдинг чакмонинг билан.
БМТнинг қошонасига
Кириб бординг кетмонинг билан.
Соддадилим, андишам Ватан,
Озод элим, ҳар решам Ватан.

Инқилобу суронлар аро,
Азобларда пешланди калла.
Бошга тортди бухронлар аро
Бири шалка, бирови салла.
Бошни омон сақлаган Ватан,
Адолатни ёқлаган Ватан.

Дарё эдинг, оқдинг шарқираб,
Озод бўлдинг зулм сабридан.
Манглайингда толе ярқираб,
Халос бўлдинг кишан жабридан.
Жигар-бағри доғланган Ватан,
Қиличларда тобланган Ватан.

Дуо билан кўкарган элсан,
Сабр билан енгган балони.
Қўйдаёй ёввош, шикаста дилсан,
Тиканлардан зада товони.
Андишада султонсан Ватан,
Кўтарилсанг, вулқонсан Ватан.

Алломалар улуғлаган юрт,
Олам яна кўрди бўйини.

Чандигини пешонангга сурт,
Пайваста қил тўйга-тўйини.

Юлдуз бўлиб чорлаган Ватан.
Кўк тоқида порлаган Ватан.

СЕН БАҲОРНИ БОШЛАБ КЕЛАСАН

Кўзларингда чақмоқ ёлқини,
Сочларингда шиддат тўлқини.
Васлинг ишқнинг сархуш талқини,
Сен баҳорни бошлаб келасан.

Қизғалдоққа тўлади томлар,
Дилдан озод бўлади ғамлар.
Ҳуш ҳаволи, наволи дамлар
Сен баҳорни бошлаб келасан.

Хуммор кулишларинг чиройли,
Нозли юришларинг чиройли.
Инжу кумушларинг чиройли,
Сен баҳорни бошлаб келасан.

Фунчалайди бўғзимда ҳайрат,
Боғлар қўйни гуллаган жаннат,
Бу не гулшан, бу қандай санъат,
Сен баҳорни бошлаб келасан.

Уйғонади баҳор ҳар нишда,
Қувват олар ҳар гул, ҳар ришга,
Сулув хилқат, қутлуғ фаришта,
Сен баҳорни бошлаб келасан.

Жаннат гули Момо Ҳаввосан,
Одам Ато айтган навосан.
Қанча мақтов бўлса равосан,
Сен баҳорни бошлаб келасан.

Кўкда Хулкар бўлиб порлаган,
Ерда гавҳар бўлиб чорлаган,
Айт, ким сента кўнгил ёрмаган,
Сен баҳорни бошлаб келасан.

Найчалайди найсонда тупроқ,
Яшил олам ёзади япроқ.
Боғларда бахт гуллайди оппоқ,
Сен баҳорни бошлаб келасан.

ОЙБАРЧИННИНГ НИДОСИ

Лочин кетиб, юришларинг бўлди ғоз,
Яхши билан ёмон фарқи қолди оз,
Алл туғи тикланмасми бир кун боз,
Алпомишдан кўрқмайсанми, Ултонтоз?

Ўз қавмингни бунча қийнаб хўрладинг,
Аямадинг, ёппасига зўрладинг,
Бойсун узра ўргимчакдай тўрладинг,
Алпомишдан кўрқмайсанми, Ултонтоз?

Ултонмиди, султонмиди насабинг,
Тозимиди, қозимиди мансабинг,
Кимга керак тирик мурда жасадинг,
Алпомишдан кўрқмайсанми, Ултонтоз?

Жон бошига солим сўраб келибсан,
Ҳаддан ошиб, қўлим сўраб келибсан,
Тақдирингга ўлим сўраб келибсан,
Алпомишдан кўрқмайсанми, Ултонтоз?

Бойсун эли асли феъли кенг бўлган,
Бири энду, бири бўйу енг бўлган,
Қузғун қачон бургут билан тенг бўлган,
Алпомишдан кўрқмайсанми, Ултонтоз?

Қилмишингни эл-улус ҳам билади,
Яраггандан фақат тавфиқ тилади,
Эрта-индин Алпомиш ҳам келади,
Шунда унга нима дейсан, Ултонтоз?

АСҚАР МАҲКАМ ХОТИРАСИ

Бир гиёҳ атридай ифор сочмасанг,
Шамчироқ тафтидай қалр топмасанг,
Дилга йўл очмасанг, кетмон чопмасанг
Ичган тузинг қолар қолса фанода.

Магарким роҳатда юз йил яшадинг,
Суянчиқ бўлолмас топган мансабинг,
Тупроққа қорилар совуқ жасадинг
Босган изинг қолар қолса фанода.

Эгилиб ер ўтма ҳар хас олдида,
Умрингни совурма галварс олдида,
Ўзингни хор тутма нокас олдида
Жасур сўзинг қолар қолса фанода.

Муслимдай яшадинг, таслим бўлма ҳеч,
Ғаддор, қул халойиқ таъмасидан кеч,
Ложарам, дунёнинг нағмасидан кеч
Ёруғ юзинг қолар қолса фанода.

Юзингда нур бўлсин, ғайри сўйлама,
Учраган ҳар касга дардинг тўйлама,
Яхшисан, ёмонлик ҳаргиз ўйлама
Босган изинг қолар қолса фанода.

Аҳли ниймон бўлса, дил тафтини соч,
Дўсту меҳмон келса, қучоғингни оч,
Баракали уйга қўнар қалдирғоч
Ўғил-қизинг қолар қолса фанода.

ФАСЛИ ҲАМАЛ

Фасли ҳамал тоқатида битди савур,
Замин юмшаб, меҳваридан чиқди ҳовур.
Қизғалдоқлар қоматлари бўлди савр
Сулув қизлар ёноғида кулди Наврӯз,
Кушчаларнинг сайроғида келди Наврӯз.

Илдиз отиб, ерда тупроқ найчалади,
Такбир ўқиб яшил ўтлоқ майсалади,
Ёш юраклар тунда уйғоқ най чалади
Гул-чечаклар япроғида кулди Наврӯз,
Бойчечаклар дудоғида келди Наврӯз.

Яллиғланар Афросиёб хобгоҳлари,
Нурга тўлар авлиёлар даргоҳлари,
Юрагимни сел қилади сеғоҳлари
Ул қадим жон тупроғида кулди Наврӯз,
Абри найсон фиरोғида келди Наврӯз.

Само гумбур, сувда ёмғир думчалайди,
Ҳар юракда ишқ ниҳоли ғунчалайди,
Висол истар қанча Мажнун, қанча Лайли
Ўт-чақинлар чароғида кулди Наврӯз,
Ўтли кўзлар қароғида келди Наврӯз.

Бўлди ҳулво интизор дил гардишлари,
Қилди ялло муҳаббатнинг дарвишлари,
Омон бўлсин шодликлари, ташвишлари
Мажнунтоллар чироғида кулди Наврӯз,
Қизғалдоқлар байроғида келди Наврӯз.

Бу соҳилга етганларнинг ризқи бутун,
Қора қозон ўчоғидан чиқсин тутун,
Ҳалим билан сумалакка келтир ўтин
Сардафтарим вароғида кулди Наврӯз,
Чакмонимнинг ямоғида келди Наврӯз.

ЖАНГНОМАИ ЯҲЁ

Ҳар бир бошда ҳар турфа,
Бўлар экан ҳангома.
Икки бошга бир кўрна,
Шундан барча жангнома.

Тор кўрпани талашиб,
Оёқ-қўллар толади.
Бошга тортганда сабил
Оёқ чиқиб қолади.

Хотин истайди ором,
Мен истайман ҳаловат.
Чорак асрдан буён
Бўй бермайди касофат.

Икки бошни бир қилиб,
Ямаб келдик йўрмалаб,
Бир кўрпадан тўрт бола,
Чиқиб кетди ўрмалаб.

Бир кўрпада умримиз,
Икки бошга бир айвон.
Эру хотин қўш ҳўкиз,
Дилда тахти Сулаймон.

Хотин торгади бошга,
Мен торгаман оёққа.
Кетай десам бош олиб,
Хотин дейди "Қаёққа?".

Сабр қилсак, ҳадемай,
Бу кунлар ҳам ўтади.
Омон бўлсак бир кўрна,
Ҳаммамизга етади.

ШОИРЛАРНИНГ БАХШИСИ

Азим Суюнга

Қуёш чиқар оловланиб Оқтовдан,
Жуманбулбул авжи янграр утовдан,
Дўмбиранинг мавжи тинмас қутловдан,
Азим Суюн пешвоз чиқар элига.

Чавандозлар жар солади тўй-тўйлаб,
Баковуллар меҳмон кутар ҳой-ҳойлаб,
Давра тортган Алпомишдай бел бойлаб,
Азим Суюн пешвоз чиқар элига.

Нуротанинг тулпорлари кишнайди,
Бургутлари чўққиларда қишлайди,
Юрагида қизғалдоқлар яшнайди.
Азим Суюн пешвоз чиқар элига.

Элга эрка бўлар шоир султони,
Сўзи билан энтиктирар дунёни,
Кўшиқларга Ватан бўлар осмони,
Азим Суюн пешвоз чиқар элига.

Чавандознинг зўри улоқ олади,
Ёвни кўрса йнгит яроқ олади,
Ватан учун шоир байроқ бўлади,
Азим Суюн пешвоз чиқар элига.

Ўлчов эмас унга умр мезони,
Бола мисол идрок қилар дунёни,
Юракларга жойлар меҳригиёни,
Азим Суюн пешвоз чиқар элига.

Сўзларидан уфуради дашт иси,
Ўланларга гал берайлик яхшиси,
Авлиёлар қўллаган юрт бахшиси,
Азим Суюн пешвоз чиқар элига.

ҲАМАЛ КЕЛДИ

Қирлар ёнар ял-ял само чароғидан,
Қизғалдоқлар мултирайди қароғидан,
Бойчечаклар ўпар чақин ёноғидан,
Тупроқ нишлаб, томирига амал келди,
Узоқ қишлаб Наврўз ила ҳамал келди.

Чучмомалар чопқиллайди қир бошига,
Турнақатор қушлар учар йил бошига,
Айланади қизлар баҳор сирдошига
Яшил олам изҳорига тамал келди,
Чақин чақнаб Наврўз ила ҳамал келди.

Қушлар сархуш юрақларнинг сайроғидан,
Соғинч тошар нигоҳларнинг қирроғидан,
Найсон ёғар булутларнинг дудоғидан
Қамалакнинг камонида қамал келди,
Фамза ташлаб Наврўз ила ҳамал келди.

Қийғос боғлар сочқилайди гул исини
Мажнун кўнгил ичар ҳилол ёғдусини,
Настаринлар яширади кулгусини
Қалдирғочлар навосида ғазал келди,
Ялла бошлаб Наврўз ила ҳамал келди.

Қуш тилига мушки ҳулво шайдо бўлди,
Дастурхонда сумалаклар пайдо бўлди.
Бутун боғда савр қадди Лайло бўлди
Уйғон энди, қадимижон азал келди,
Дала даштлаб Наврўз ила ҳамал келди.

Ҳатти малак эрка фасл зебосида,
Етти фалак нурланади либосида,
Келинсалом нози аён ибосида,
Ишқ майидан жомсўз айтар маҳал келди,
Кулиб яшнаб Наврўз ила ҳамал келди.

СОҲИБҚИРОНДИР ВАТАН!

Олам аро меҳроби жондир ватан,
Дил чароғи, офтоби кондир ватан.
Осмонимда моҳитобондир ватан,
Бўстонимда тахтиравондир ватан.

Жонга дармон, танга қўрғондир ватан,
Элга султон, дилга иймондир, ватан.

Дов чавондоз донғи чиқмас самансиз,
Бенаводир булбул боғу чамансиз.
Фурбат ичра ғариб ўлгай кафансиз.
Тирикликда қувонч йўқдир ватансиз.

Бешигимга тоқи нарвондир ватан,
Эшигимга рўйи жаҳондир ватан.

Неча вақтким, тилим ғофил жим эдим,
Ғарчи донғим, байти Бобил, Рим эдим,
Сен бўлмасанг бу фанода ким эдим,
Банди бедил, эрки йўқ маҳкум эдим.

Салтанатда Соҳибқирондир ватан.
Кўшки ирфон, бошчи карвондир ватан.

Гиёҳингни жонимга пайванд қилай,
Қучоғингни равзаи жаннат қилай,
Тупроғингни кўзимга зийнат қилай,
Таърифингни аҳли аржуманд қилай.

Гулшанлари рангинкамондир ватан,
Ўғлонлари элга посбондир ватан.

Менда кўрку ҳашамларга йўқ ҳавас,
Чанқоғимга яхна чойинг бўлса бас,
Уй томида қизғалдоқлар кулса бас,
Меҳри тафтинг зарби қалбда урса бас.

Боболар жон тиккан макондир ватан,
Болам ардоқлаган райҳондир ватан.

АЁЛ ВА БАҲОР

Ўзинг хурга ўхшаб кетасан.
Кўзинг нурга ўхшаб кетади.
Сўзинг гулга ўхшаб кетади,
Келган сенми, ёки баҳорми?

Суягимни қақшатди аёз,
Қанотимни чарчатди парвоз,
Нигоҳимни яшнатди хуш соз,
Кулган сенми, ёки баҳорми?

Боғлар хандон отди қиқирлаб,
Найсон инжу сочди шитирлаб.
Қулоғимга ишқдан шивирлаб
Елган сенми, ёки баҳорми?

Сени кўриб олам уйғонди,
Сочин ўриб, сабо тўлғанди,
Қир-далалар гулга чулғанди,
Гулшан сенми, ёки баҳорми?

Шаффоф бўлди ойдин кечалар,
Нурга тўлди рангин кўчалар
Майгун бўлди мажнунпешалар
Севган сенми, ёки баҳорми?

Ўзинг малак, ўзинг капалак,
Гоҳи камон, гоҳи камалак,
Гоҳи ҳалим, гоҳи сумалак.
Эркам сенми, ёки баҳорми?

Яна қандай айлайин қиёс,
Одамга жон ато қилган соз.
Васлинг қилди ҳижрондан халос
Кўркам сенми, ёки баҳорми?

Сен жаннатдан адашиб тушган
Хурлиқосан, самандар қушсан.

Равза бўлди сен қучган гулшан,
Чаман сенми. ёки баҳорми?

Юзинг зебо, ифоринг ялпиз,
Кўзинг шаҳло, чиройинг наргис.
Оғушига фарқ этган денгиз -
Уммон сенми, ёки баҳорми?

БАҲОР ТАШРИФИ

Оҳулиги шаҳлога қиёс,
Жодулиги Лайлога қиёс,
Ярашади ҳар қандай либос
Оразлари ризвонга ўхшар.

Бу не ҳайрат, бу не тароват,
Юракларга сунди ҳарорат.
Гиёҳларда унди жасорат
Иффорлари райҳонга ўхшар.

Чақин чақнар шарор васлида,
Дала-даштлар гулзор қасдида.
Бир қиз келар дийдор фаслида
Инжулари найсонга ўхшар.

Ёноқлари уфқдан ял-ял,
Ҳар гиёҳга беради сайқал.
Қизгалдоқлар пойида машғал,
Нигоҳлари уммонга ўхшар.

Оғочларда тирқирар япроқ,
Ишқ тафтидан гуллайди тупроқ.
Қалдирғочлар парвози шўхроқ,
Қанотлари исёнга ўхшар.

Беҳуд кунлар аркони рўё,
Чўмилади шодликка дунё,
Бир қиз келар тийнати раъно,
Қоматлари филмонга ўхшар.

СОҒИНДИМ

Фироқингда жонима ўт туташди,
Оташида куйди Карбало дашти.
Ҳажринг васли ҳижрон ила дучлашди
Ширин калом сўзларингни соғиндим,
Келин салом нозларингни соғиндим.

Оху моҳлар елиб ўтди йўлимдан,
Қизгалдоқлар кулиб тутди қўлимдан.
Оққуш йиллар учди ўнгу сўлимдан
Камон қошли кўзларингни соғиндим,
Келин салом нозларингни соғиндим.

Инжуларинг ўхшар абру найсона,
Жодуларинг менгзар оби ҳайвона.
Телба кўнглим элга бўлди афсона
Шубҳа-гумон розларингни соғиндим,
Келин салом нозларингни соғиндим.

Дилдорлигинг қолишмайди малақдан,
Сен парисан тушиб келган фалақдан.
Дийдорингни бир кўришга ҳалакман
Дугор-танбур созларингни соғиндим,
Келин салом нозларингни соғиндим.

Атринг жаннат сунбулининг ифори,
Сайёд кўнглим бўлди сайдинг шикори.
Воҳ қаддинга сандувоч дил нисори
Олма-анор боғларингни соғиндим,
Келин салом нозларингни соғиндим.

Чечаклардан сенга бўлсин дуолар,
Ишқ меҳроби менга бўлди ридолар.
Ташрифингни бўлдим кутиб адолар
Сўлим баҳор-ёзларингни соғиндим,
Келин салом нозларингни соғиндим.

ЗЕБОНА

Чўлпонга ўхшатма

Қизлар қоши ёй бўлди,
Зулфи суман сой бўлди.
Тун қўйнида тўлғаниб
Ҳилол тўлин ой бўлди.

Гулим-гулим. гулимой,
Тўлин-тўлин, тўлин ой,
Булбул розини тинглаб
Қизлар бўлди келиной.

Нақарот

Келин-келин келиной,
Ҳилол бўлди тўлин ой.
Тўлин-тўлин, тўлин ой,
Қизлар бўлди келиной.

Куёш кўкда чўғланди,
Замин нурга чуғланди
Ўпич олиб кўклардан
Кўнгилда ишқ уйғонди.

Нақарот

Нур сочилди гулшанга,
Гулга тўлди гўшанга.
Келин-куёв пойига
Сочилди тилло танга.

Нақарот

Зебо-зебо, зебона,
Қизлар бўлди жонона.
Вомиқ ҳажрида Узро
Ўхшар моҳитобона.

Нақарот

Келин-келин келиной,
Ҳилол бўлди тўлин ой.
Тўлин-тўлин, тўлин ой,
Қизлар бўлди келиной.

Сабр жоми тўлар бир куни,
 Ёқтирмайсан агёр хулқини.
 Кўрмай дейсан рафтор-турқини —
 Султон кўнгил хилватни истар.

Лайли йиллар ўтар билдирмай,
 Кўпкарига солар тиндирмай.
 Фиротинг ҳам кўяр миндирмай,
 Вулқон кўнгил шиддатни истар.

Мушфиқ онанг тушар ёдингга,
 Келолмайди у ҳам ёнингга.
 Замин заранг, етмас додингга
 Армон кўнгил сийрагни истар.

Кўш ҳайдовга қолсанг ярамай,
 Хотининг ҳам кўяр қарамай.
 Фарзандларинг қочар сўрамай —
 Карвон кўнгил сарҳадни истар.

Яшашда йўқ на мантиқ ҳазми,
 Гирдинг тўла аросат базми.
 Сухан ғафлат сохтакор назми —
 Сўзон кўнгил жаннатни истар.

Олтов бўлсанг отангдан ёлғиз,
 Қайда ака-ука, ўгил-қиз?
 Шаробдан қуй, эй умри азиз,
 Меҳмон кўнгил улфатни истар.

Боқиб кузда учган япроққа,
 Кўз ёшларинг томар тупроққа.
 Чақирганда бир кун сўроққа —
 Ҳижрон кўнгил ваҳдатни истар.

СУҲАЙЛО

Яна сени кургим келди Суҳайло,
Сочларингни ўргим келди Суҳайло,
Сочинг занжиридай кўнглим паришон,
Изларингдан юргим келди Суҳайло.

Нақарот

Лайли-Лайло-Лайло, қилдинг адо Суҳайло,
Лайло-Лайло-Лайли, жоним фидо Суҳайло.

Қизғалдоқлар оҳи тутди саҳрони,
Мажнун бўлдим, гуллади ишқ армони.
Адо қилди мужгонларинг пайкони
Яна сени кўргим келди Суҳайло.

Нақарот

Сани излаб Адан даштида доғман,
На қаландар, на телбаман на соғман.
Парвонага талпинган шамчироқман,
Яна сени кўргим келди Суҳайло.

Нақарот

Қайлардасан қоши абрў камона,
Лаби кавсар, сўзи оби ҳайвона.
Сани кўмсаб тўлар бўлди паймона,
Яна сени кўргим келди Суҳайло.

Нақарот

Қанча нозу фироқларда адашдим,
Олма-анор дулоқларда адашдим.
Ишқдан олган сабоқларда адашдим,
Яна сени кўргим келди Суҳайло.

Нақарот

Даврон ўтар, карвон йўли тўхтамас.
Жонон ўтар, армон йўли тўхтамас.
Бу дунёда ҳеч ким сента ўхшамас,
Яна сени кўргим келди Суҳайло.

САМАРҚАНД МАДҲИ

Гулгун ватан бўстонида дилдор Самарқанд,
Юлдуз чаман осмонида гулзор Самарқанд.

Боғлари бол, оби зилол, бағри хушанбар,
Кўксига зеб бермиш ҳилол, шаъни музаффар.

Илми улуғ, бахти тўлуғ, хуммор Самарқанд,
Байрамларинг бўлсин қутлуғ, алёр Самарқанд.

Дўстга очиқ дарвозаси, тўкин дастурхон,
Олам аро овозаси тилларда дoston.

Алломалар бешигида бардор Самарқанд,
Ҳар фарзанди эшигида сардор Самарқанд.

Авлиёлар қўллар мудом чилтонларини,
Ҳидоятга йўллар мудом султонларини.

Кўҳна замин тупроғида зуннор Самарқанд,
Обидалар ардоғида туммор Самарқанд.

Қадим сўғдининг садосидан Зардўшт Самарқанд,
Пиру комил дуосидан баржўш Самарқанд.

СОРБОН САМАРҚАНД

Олам элининг ифтихори, сорбони Самарқанд,
Кўнгил уйининг меҳрибони, дарбони Самарқанд,

Дилдор топмадим дунё кезиб етти иқлимда,
Тинчлик элининг дилда бори, посбони Самарқанд.

Ҳар бир қаричи авлиёлар, пирлар макони
Тарих қатида барча замон мардони Самарқанд.

Нозли хироми гулғулага ташлади жонни,
Бир ишва билан олди хаёл, жонони Самарқанд.

Ёғий пайкони шуъласида олди аланга,
Кул бўлди қуёш, жангу жадал қурбони Самарқанд.

Қаддини тутиб қайта бино бўлди неча бор,
Мангу жовидон бўлди яна фармони Самарқанд.

Зардушт ишқидан ваҳдат сари қўйди қаламни,
Қадри улуғу, нурга тўлиқ осмони Самарқанд.

Алп Эртўнганинг ҳур чамани, рахшони Самарқанд.
Дунё элининг шаҳсувори, достони Самарқанд.

БИЛМАСИН

Ўнг қўлинг қилган амални чапда ағёр билмасин,
Сўл қўлинг кезган чаманни ўнгда дилдор билмасин.

Яхшилик дарёси улким, хислати таъма эмас,
Яхшилик қилсанг балиққа, оққан анҳор билмасин.

Мақсудинг хайру эҳсондир, савту шоён шарт эмас,
Обод эрса битта кўнгул, кимса асрор билмасин.

Андалиб боғларда пиёҳон, хониши оламга хуш,
Гунча лаб очса саҳарда гулу гулзор билмасин.

Мартабанг бисёр кўпайсин, элда шўриш айлама,
Ади ила дунёни олгил, кўкда жаббор билмасин.

Дўсту улфат даврасида ҳар сўзингни пухта қил.
Қанча қилсанг базми жамшид, уйда рўзғор билмасин.

Гул ҳаёт дор бирла дорбоз, эгласанг ўйнашга қир,
Эгламас эрсанг усулни оғочи дор билмасин.

ЯҲЁГА АЙТ

Фасли ишқ Мажнун қиёс, рози дил Лайлогга айт,
Лаблари қирмиз гилос, юзи гул раънога айт.

Еру кўк белбоғида, нурли тонг тўлбоғида,
Айни кўклам чоғида, ол яноқ сахрога айт.

Лаҳзалар тақдир хати, тахланар йиллар қати,
Йўқ тириклик шафқати, бетиним дарёга айт.

Келмоғу кетмоқ тайин, англатар борган сайин,
Сипқариб ноби майин, ҳур сўзинг дунёга айт.

Бўлмагил нокасга пеш, йўлда йўлдош бўлма ҳеч,
Ваъдаси тоғ бўлса кеч, рафтори яғмога айт.

Хуш калом, суҳбати дил, бул ҳаёт малҳами бил,
Лафзини пайваста қил, соқиб жонога айт.

Не гапинг бўлса жигар, сенга эш бўлмас дигар.
Аҳволингдан бер хабар, коғиб-ул Яҳёга айт.

ТАСАДДУҚ

Ёрни ярағиб кўкда ўзи ҳайрона тасаддуқ,
Қоши қаламу, оҳу кўзи мастона тасаддуқ

Жонимға солиб ишқ ўтини ўтлию кетди,
Аршга ўрлади ўт тутуни, жонона тасаддуқ.

Майда қадами, нозли хиром, кулгуси пинҳон,
Неча ошиғи бўлди гулом, хандона тасаддуқ.

Занжир зулфини дор қилибон бўйниға солди,
Қисмат кўкида моҳитобон, девона тасаддуқ.

Бир бўса сўраб бўлди бало, ғаввога қолдим.
Бошимға келиб амма-хало, баҳона тасаддуқ.
Майдонға солиб, қилди сазо, бўлди тамошо,
Ўртала намоз бўлди қазо, сарсона тасаддуқ.

Олдиға солиб қувди хотун, қилди баларға.
Бўлди тўшагим энди бу тун, чойхона тасаддуқ.

Май ичма дебон, кодға куйиб эрди табибим,
Расво айлади элга ёйиб, майхона тасаддуқ.

ФАСЛИ ИШҚ

Дил қафасда бастадур, бедаво дунёда ишқ,
Бил, салафда қатра дур, хушнаво шаббода ишқ.

Ул тахир майдир қадим, ҳолини айтмас надим,
Сўрғил ичган кимсадин, ғам ила ғамбода ишқ.

Ҳажр ўти ғаддор ғаним, тутди кўкни гулханим,
Алмисоқдин шу таним, бир умр савдода ишқ.

Фасли кўклам туғ бўлиб, қир-адирда чўғ униб,
Лолаву туғён тўлиб, унди ул саҳрода ишқ.

Қадди сарви навниҳол, чехраси чақноқ ҳилол,
Ишваси оҳу мисол, ҳур малак сиймода ишқ.

Бир боқиб жонни ёқар, қўйнига ойни тақар,
Булбули куйлар саҳар, гул юзи раънода ишқ.

Ким худога бандадур, ишқ либоси тандадур.
Ҳоҳи кимхоб, жандадур, даҳр аро сажжода ишқ.

Севги шундай меваки, карвон ўтди, лемаки.
Гул ҳаёт бир кемаки, кўр олур ялдода ишқ.

Кўр, алаф кавшаб ҳўкиз, тан юқиб бўлмас тўкис.
Терт қориб, шулха егиз, пеш бўлур бардода ишқ.

Мирламас тиллою зар, англамас ўткинчи хар,
Юлдузингда бўлса гар, сарвари мирзода ишқ.

ЖУЛДУРВАҚОҒА

Мастона кўзим тушди эвоҳ қоши қароға,
Ғамзаси ила битта нигоҳ солди балоға.

Ман ўтли қарош уммониға фарқ бўлақолдим,
Жонимни олиб домониға, солди тараға.

Васлида неча ахтари шаб ёндим-у куйдим,
Ишқ пайконини дилға қадаб солди садоға.

Ит мунги илз телба-саёқ нолалар эгтим,
Атоси чиқиб урди таёқ, солди жудоға.

Аноси боқиб бошдин-аёқ ҳолима кулди,
Берарға қизим деди у йўқ, жулдуврвақоға.

Кошона қуриб, сўнг савтиға Нексия жуфгла,
Қолғони бадалдур завчиға, солғил ароға.

Аносин кўриб, қизини ол, деб эрди тўтам,
Барбод бўлди ишқ, ёй қадди-дол қолди модоға.

Кўнгил уйидин ўзга ватан, ўзга макон йўқ,
Кўнгил уйидек тилка бадан қолди гадоға.

СОМСАДИН

Мода бўлғон кўйнаклар кўтарилмуш тиззадин,
Адо бўлғон эркаклар ўлар бўлди иззадин.

Хўп кўпаймиш шарми йўқ, билолмассен гарми-йўқ,
Кўйлагининг ярми йўқ, юз қизармиш жиззадин.

Ажаб замонға қаранг, кўпчиган сонлар таранг,
Ёш яланг аланг-жаланг, ним яланғоч жуссадин.

Қорин қолғон очилиб, ёки чиққан шошилиб,
Бор буд-шуди чочилиб қолғон каби киссадин.

Улусда ор бўлмаса, шарму қарор бўлмаса,
Ошинг ҳалол бўлмаса, шулдир дарак ғуссадин.

Эркаги хотинмижоз, хотинлар бўлди хўроз,
Гарданида тош-тароз, чиқмас садо кимсадин.

Байталлар гастарбайтал, эр уйда йнғар чўтал,
Жонинг бўлса бир йўтал, бул беибо ғамзадин.

Бу дунё боғи майдон, шўр бошинг бўлсин омон.
Элда кўпаймиш шайтон, хулоса қил қиссадин,

Дедим Ҳижрат алҳазар, ён-гирдингга сол назар,
Ҳаромдин қилғил ҳазар, кечма арзон сомсадин.

ОЙПАРИ

Майн нобни нўш қилиб, тили бийрон ойпари,
Гап-гаштакни хуш қилиб, сурди даврон ойпари.

Эр уйда бола боқар, хотин ноғора қоқар,
Кўчада бола-бақар бўлди сарсон ойпари.

Маскоп, Бангкокк қолмади, қатнайвериб толмади,
Бандадин уёлмади, ҳирсга қурбон ойпари.

Не сирни қилғум баён, ўзи шундоқ ҳам аён,
Икки елкада шайтон, кетар қаён ойпари.

Кўкрак-киндик яланғоч, ҳой мусулмон, кўрсанг қоч,
Турли рангда калта соч, қочди иймон ойпари .

Ёрнинг зулфи жамалак, эрнинг номи ҳезалак,
Бу қандай гап, ё фалак, ёнди осмон ойпари.

Даврада бермас гапни, чайпайди ўнгу чапни,
Тегирмон қилиб лабни, қилди дoston ойпари.

Ҳасратда ўтар Ҳижрат, аланга олар гафлат,
Бир кун келтирар кулфат ушбу хирмон ойпари.

БАРДАКИ

Англасанг эй бандаки, бешумор эл мардаки,
Занчалишдир гартаки, бир хилидур шартаки.

Феълини билмоқ эсанг, сал бериб кўрғил пишанг,
Бўш-баёви талаки, дов-даёви ҳаппаки.

Шамғалат бўлса кўзинг, мирламас таппоң тузинг,
Мол топодур ҳуштаки, жим қоподур кўппаки.

Хуш кўрур овозани, ланг қилур дарвозани,
Сотса ширмой, чапчаки, кавшағони чалпаки.

Сал жиловни бўшласанг, бош эгиб хўш-хўшласанг,
Лоф уродур тентаки, чанг солодур гуппаки

Кўрсаки ҳоли хароб, лафзида бўлмас жавоб.
Бошға сифмай телпаки, рост бўлодур жуфтаки.

Бирда ёр ҳамду-сано, бирда бор жабру-жафо,
Бирда кўрсанг калтаки, бирда кўрсанг пистаки.

Ранг олур кўрға қараб, ожизу зўрға қараб,
Бирда бўлур луччаки, бирда себи жўпаки.

Макридин йўқдур нажот, шайтанат ичра ҳаёт,
Бир бўлур ғоз-ўрдаки, бир чироққа пилтаки.

Измиға тушсанг магар, сағринга солғай эгар,
Бошда турса сўтаки, дер анонгни гўдаки.

Олқишини шод билиб, тур ишини ёл билиб,
Ярми урғай чапаки, ярми қилғай қапаки.

Одаму Ҳавво ила, Ҳюжрато тавфиқ тила,
Бўлмасин қай диндаки, чиқди дунё бардаки.

БАЛОДУР

Олар эрсанг барор сўзни, ҳадни билмас нафс балодур,
Қай томонға бурма юзни, шайтон берғон дарс балодур.

Сўзингни елга совурма, ўзингни утда қовурма,
Чиранма, асло дов урма, нодон ила баҳс балодур.

Ёмонға ёндошиб юрма, май ичиб аржуманд кўрма,
Оқибатинг бўлур турма, шерик бўлғон наҳс балодур.

Учрағонни ошна тугма, дардинг айтиб шафё кутма,
Яхши дўст чиқмайдди гушна, сиринг билғон кас балодур.

Ботмағон ўпкадек қўлма, авомни шилталаб ўпма,
Мисқоли обрўни тўкма, эл кўзида маст балодур.

Майдагап, занчалиш бўлма, ҳиринглаб ҳар сўзға кулма,
Бетингдан чимматинг юлма, ғайри чиққан сас балодур.

Ўзингни хору хас билғил, тирикликни қафас билғил,
Ҳаётинг бир нафас билғил, ҳаром бўлса, хас балодур.

Ҳалол эрса бурда конинг, шул мартаба эрур шонинг,
Ҳижрат омон бўлур жонинг, тилни қулф қил, бас, балодур.

ЧИРОҚ

Кунда бир ўчди чироқ, тунда бир ўчди чироқ,
Шамчироқ бўлди қароқ, кимга қилсак арз-сўроқ.

Куйди уйда кирмошин, кирмошин бўлди хотин,
Қолмади асбоб бутун, барчаси тилка-қуроқ.

Дилбузар дилни бузар, ҳар кўни уста тузар,
Вовайло қилди гузар, касда қолмади мароқ.

Жамланиб уч-тўрт калон, урди ўзни тўрт томон,
Айди бир ширинзабон, топшириқ шундоқ бироқ.

Бўлди тоқатлар таранг, ёқ-ўчир қилди гаранг,
Ер ҳамин сахту заранг, бўлди осмон куп йироқ.

Ҳижрато чекма фироқ, қай бобонг ёққан чироқ,
Шайлагил лампачироқ, айла шағамни яроқ.

Замзама бўлма жўра, чечадин аҳвол сўра,
Бунча ғавғодин кўра, бир таҳорат яхшироқ.

ИСТАЮР

Қолмади рўзимда ранж, сийрат сувайдо истаюр,
Ман Юсуф, розимда авж, кўнгил Зулайҳо истаюр.

Ваҳ ажиб, баҳри муҳит гардунда ғавғо кўзғатур,
Турланиб сабри ҳудуд мажнунда савдо истаюр.

Найсони май ноби хуш, айлади ҳар сабза нўш,
Шамс уриб чимматға тўш, сайронда танҳо истаюр.

Кўк чақини найздор, пайконида йўқ қарор,
Чор тарафда авж шарор, рақсиға шайдо истаюр.

Тўлғанур тупроқда жон, уйғонур сабру ниҳон,
Найчалар ҳар битта дон, хилқатда пайдо истаюр.

Ўрганиб еру само, бўлди олам хушқаво,
Дилға солди ишқ наво, суҳбати жоно истаюр.

Гулға тўлди Карбало, кечди юздин қаҳрабо,
Эмди Мажнун марҳабо, васлиға Лайло истаюр.

Фасли кўкламда хиром, нозидин Ҳижрат гулом,
Жуфглади оташ калом, бир малаксиймо истаюр.

СОҒИНДУК

Эй, мўрча-миён, қоши-камон сизни соғиндук,
Вей, гунча даҳон, нозли забон қизни соғиндук.

Шўхи гуломи матлубида савдоға чиқсак,
Сабзаи кўклам хайлида қирмизни соғиндук.

Дилдора боқуб лахча шарор ичра бу жоним,
Фаттон нигоҳи пайкону ёлғизни соғиндук.

Иффорин олиб този сифат қилдук вовайло,
Настарину хуш бўйи ул ялпизни соғиндук.

Чақмоқ мисоли тилкалади ғамза ғамимни,
Кел-кел боғима, булбулу гул юзни соғиндук.

Муғбачаи бодафуруш Пошоға хабар қил,
Хуш улфат ила шаққари жиз-бизни соғиндук.

Савти Фулом, Яҳё, Наби, Чоршамни йиғиб кел,
Ибоди жамол илҳоми тамизни соғиндук.

Хижратни тамом динға букиб шаҳри зимистон,
Султон базмида дийдори Хурмузни соғиндук.

ТАБИАТНИНГ

Бўлди каждуми ақраб авзони табиатнинг.
Ялдоға шикор ўлди аркони табиатнинг.

Шамъи Баҳром гардиши юз қаро бўлмиш не тонг,
Чиллаи чироқ янглиғ хирмони табиатнинг.

Бозиллаб танча-танур, гирдига маҳтал мардум,
Самум ҳукмиға тушмиш кўрғони табиатнинг.

Хут ила ҳойи-хутти тақвоси бўлди бардор,
Қачон киргувси эмди дармони табиатнинг.

Ишқни соғунтик эй ёр, дил ғубордин кемтик. ёр,
Кўклямдин дарак олий фармони табиатнинг.

Ўртаниб дашту дала, исёнда ўтов-оғоч,
Саҳрони тутгай эмди ризвони табиатнинг.

Нозли ҳимоси ҳай-ҳай, жондин ўтуб билинди,
Ҳар дилда оташ лавҳи жонони табиатнинг.

Ҳижрат ғимиллаб қолди, чашми чаросни кўруб,
Ишқига бўлди доя, юрмони табиатнинг.

ПАРДАСИДУРМИЗ

Яронлар бул фаносинда гуноҳкор бандасидурмиз,
Икки чўбин аросинда Яратган хандасидурмиз.

Расул ботини покланди ҳукм бирлан қаролиқдин,
Дил қаролиқ куфри ботин, сийрати жандасидурмиз.

Ҳирсу нафсга кўнгил боғлаб, охиратингни куйдирма,
Макри шайтонни ўқитган хиёнат рандасидурмиз.

Тилида такбири инсоф, дилида тадбили зардоб.
Тазарру қилмаган нодон авомнинг гандасидурмиз.

Танинг туфроққа етмасдин, тийил бад кирдикорлардин,
Равзадин мосуво бўлган аврати мандасидурмиз.

Ўтур бир-бир ямон-яхши, омонат ҳар сўзинг нақши,
Изингдин ишқи жом қолсин, биз анинг саждасидурмиз.

Тириклик бухрони ичра қилма шарманда Ҳижратни,
Шу гардун узра тортилган адолат пардасидурмиз.

МАЖОРА

Одамота авлодида азму аввора,
Наслу насаб таълифида қўлди мажора.

Бири деди, хўжасифат асли уругим,
Барисига шоҳид ўтар кўҳна гаввора.

Айди бири халилуллоҳ пушти-падарзод,
Бошқасини реши етди биби Ҳажора.

Бири деди, чаро маро бовар накарди?
Фотимийлар авлодидин бизни шажора.

Дағи бирин чоғи келур наби-саидга,
Бири эшон ёрлиғида қоқар нағора.

Ён-верима боқсам магар кишвар, парихон,
Бари Худо хеши сифат қилар наззора.

Ҳижрат деди, аҳли тамиз бори шу ўлса,
Шаксиз анинг насли етар ҳадди ҳимора.

МАЛИКАИ БУДУР

Ўн саккиз минг олам эро қатрадурсан, фикр қил.
Бул тириклик манзилинда бандадурсан, шукур қил.

Махлуқотлар ичра берди, ақлу идрок. шамоийл,
Забонингга калом жуфтлаб, зиё берди зуҳур қил.

Магарким умринг ўлчовда, ҳар нафасни ҳикмат бил,
Яхшилик рушдига шайлан, улгур, югур-югур қил.

Каъбани қурмоқдан афзал, бир синиқ дил малҳами,
Давлатинг кўрғони дилга хайру эҳсон муҳр қил.

Тенг ўлур шоҳ ила дарвиш жисм ўлуб туфроқаро,
Шоҳ эсанг, дарвишни ёқла, кибру шаррни куфр қил.

Рўзи маҳшар фасли етса, сану манлин не қолур,
Марҳаматни улуғ тутғил, ҳимматсизни чуқур қил.

Ҳижрат, умр ўткинчи деб, кампирингни унутдинг,
Эмди анинг кўнглун олиб, маликаи Будур қил!

АЖАБ ДУНЁ

Амри маъруф салогинда бобо Соқий авут айди,
Бу гардунни ҳарки банда қаричи бирла ўлчайди.

Бировни ўлчови мисқол. бировни ўлчови тусмол,
Бирови ақчага банди, бириси мартаба сайди.

Бири хотунга дўст бўлғай, бири иймонга суэт бўлғай,
Бири оқил, бири овсар, бири шоҳ, бошқаси дайди.

Одам бор, амлоки эҳсон, одам бор лаънаи шайтон,
Биров рушди савоб бирла, бирини тош босур айби.

Бани одам турқи шакли, бири бадбахт, бири бахтли,
Суриштирсанг, жудо ақли, Яратганнинг шудир ғайби.

Бирини суҳбати жонон, бирини тийнати зиндон,
Жамийки ҳикмату иллат, азал дафтарида қайди.

Сани ўлчовга қўйгонинг замон қаричига сиғмас,
Ажаб дунёсидин Ҳижрат таҳорат бирла қўл чайди.

ҚОЛДИМУ?

Бобур ғазалига мухаммас

Эй фалак, маҳринг аро радди жудоси қолдимү,
Мен киби ғам чекмаган қадди адоси қолдимү,
Дархонамни тепмаган дайди ғадоси қолдимү,
Чархнинг мен кўрмаган жавру жафоси қолдимү?!
Хаста кўнглум чекмаган дарду балоси қолдимү?!

Лавхул ул-махфуз ила амрида кўргай Яздон иш,
Изминдин айро эмас гардуни пода ҳар қарич,
Ҳижрондин беҳроқ кўрмадум толеъимда ўзгариш.
Мени хор эттию қилди муддаийга парвариш,
Даҳри дунпарварни ўзга муддаоси қолдиму?!

Сиймтан маҳдудлиғидин бўлди ашким кўзда чош,
Чехран олуца эрди, айлади афшони фош,
Бул таним ўтру азобда устухонда талош,
Мени ўлтурди жафою жавр бирла ул қуёш,
Эмди тиргузмок учун меҳру вафоси қолдиму?!

Гиряи нолондамен, сўрма рўзумни эй рафиқ,
Кимсани шод кўрмадим, тингла сўзумни эй рафиқ,
Қаббаи кавсар томон ўнгла юзимни эй рафиқ,
Ошиқ ўлғач, кўрдум ўзумни ўзумга, эй рафиқ;
Ўзга кўнглумнинг бу оламда ҳароси қолдиму?!

Меҳнату зорлиқ ичинда ўтти умрим чора ҳайф,
Ёздигим ҳукми азал бўлмиш тамоми ҳарбу зарб,
Таълифин бермас парихон, на касе пир илми-гайб.
Эй кўнгул, гар Бобур ул оламни истар, қилма айб :
Тенгри учун де, оламнинг сафоси қолдиму!

ЯХШИЛИҚ

Бобур ғазалига мухаммас

Қилма касдин таъмаким, йўқтур гумондин яхшилиқ,
Пайкони жонга ғизо, бори камондин яхшилиқ,
Жисминга келгай малол руҳи-равондин яхшилиқ,
Ким кўрубдур, эй кўнгул, аҳли жаҳондин яхшилиқ,
Кимки ондин яхши йўқ, кўз тутма ондин яхшилиқ!

Ким фанога бастадур, келмади ҳаргиз шафиқ.
Ул маҳак бандиға тушғач, қахрабо бўлди ҳақиқ,
Одам аҳли алмисоқдин шул жазога мустаҳиқ,

Бу законни нафй қилсам, айб қилма, эй рафиқ,
Кўрмадим ҳаргиз, нетойин, бу закондин яхшилик.

Сағринга тўқум урулмиш, кўй они, сан тўн дема,
Сийрати ғаддор бозиға бош уруб, ҳеч кўн дема,
Аҳли рой сабри суқун маҳбули эрса жўн дема,
Дилраболардан ямонлиқ келди маҳзун кўнглума,
Келмали жонимға ҳеч ороми жондин яхшилик.

Ҳолинга зулм қилғали қалби сўқирдин басру кўп,
Лангари Хуршед пироҳан чоки фитна ўтру кўп,
Нотавон рафтори каж, бад савдосида касру кўп,
Эй кўнгул, чун яхшидин кўрдунг ямонлиқ асру кўп,
Эмди кўз тутмоқ не, яъни ҳар ямондин яхшилик.

Гардуни давворада кўрдум одамдин ваҳши йўқ,
Олчоғу сотқин риёлиқ зулматидин фаҳши йўқ,
Такбирида тавба йўқ, Яздон сужуди нақши йўқ,
Бори элга яхшилик қилғилки, мундин яхши йўқ,
Ким дегайлар даҳр аро қолди фалондин яхшилик.

Судрама танни маконда хастадил оғур киби,
Ўртама жонни ниҳонда мақтули чоғур киби,
Хушқалом аҳлиға дўст бўл ҳазрати Жобур киби,
Яхшилик аҳли жаҳонда истама Бобур киби,
Ким кўрубдур, эй кўнгул, аҳли жаҳондин яхшилик.

ТУТАЙ

Навоий ғазалига мухаммас

Авроқи арзға боқиб, авзон гарлундин ўтай,
Булажаб қисмат майи, бардорда хуш-беҳуш кетай,
Сандувочтек нолаву авранг азобини ютай,
Эй кўнгул келким, бало базмида жоми ғам тутай,
Ўз қатиқ ҳолимға ўлмастин бурун мотам тутай

Кўрким, ишқ захмидин ағёре йўқ олам аро,
Кишвари фонийда мусаллам ўтругудин тан яро,

Мен Адан даштғини манзил айласам, сўрма чаро,
Йиғлабон бошимға оҳим дудидин чирмаб қаро,
Мотамим эл сўнгра тутғунча ўзум бу дам тутай.

Афсари мардум тутуб қўйнимда сақлабмен афъо,
Шиддатидин танг келиб афзун бўлди пенгу қафо,
Рўзгоримда қолмади на хуш замон, на-да сафо,
Олам аҳлиға неча қилдим вафо, кўрдум жафо,
Эй кўнгул, кел-келки, тарки жумлаи олам тутай.

Магарким роҳи по узра пирохан жандаи жулдур,
Умидим арқоғи Шамсда, оёқим остида дулдул,
Гунча бўсаға лаб тутмас, нолакор бўлмаса булбул,
Эмдиким, ишрат суруридин очилманг, эй кўнгул,
Навҳа оҳангин тузуб, бир дам сени хуррам тутай.

Токай бўй кўрсатмағай, ҳақнинг сирожии, соқие,
Илки-по гул айлади чархни тарожи, соқие,
Телбани манзум қилур дилни хирожи соқие,
Мастлиғдин ўзга йўқ дардим иложи, соқие,
Май кетурким, ҳам ичай бир лаҳза они, ҳам тутай.

Фитнадин қисвар тўқурлар доғи юз аҳволима,
Дуди кўкка ўрлағай сўзонда сўз аҳволима,
Бир юпунчни топмадим парча бўз аҳволима,
Қўйғил, эй носихки, муғ дайрида ўз аҳволима,
Маст лояъқил ёқам йиртиб, суруди ғам тутай.

Фикрати мўру малах онғиға дур бермиш худо,
Бул чаманда жавр юки салдида гул термиш адо,
Ризқи гар шоҳонадур, нон тилаб ермиш ғало,
Чун жаҳон бирла жаҳон аҳлиға йўқ эрмиш вафо,
Эй Навоий, мен вафо сарриштасин маҳкам тутай.

МУШАРРАФ КУН

Жомий ғазалига мухаммас

Тавонат деҳ, жудо макун ки лафзи меҳрибонамро,
3-ин таври инкишоф кун жаҳди роҳи равонамро,

Шарори оташи сўзон расид он ки тавонамро,
Худовандо балутфи хеш гўё кун забонамро,
Ба дидорат мушарраф кун ду чашми хунфишонамро.

Сари по дарбадар гардаам, нахости чаро хаёлам,
Бзмисли Салмони Форси аз ишқи ту бемажолам,
Дашти Аданро саргашта басиру Мажнун мисолам
Маро аз завқи худ монанди Адҳам кун дар ин олам,
Бисўз аз ишқи худ пайваста мағзи устухонамро.

Ваҳдати жовидонро ғайри розе намебинам,
Дигар аз хулуви Яздон ғайри созе намебинам,
Хирқаи жуббапўш беғаз дигар касе намебинам
Ба ғайри маъсият дар номаам чизо намебинам,
Ба дасти нафси амморз мадеҳ ақли инонамро.

Мафар хоҳи, залили шав, бибин аз ў қарам ояд,
Зироат мунсариф в-аз ҳосили Ҳақ дарав ояд,
Оқибат кун ложарам дил ба халқи фас алам ояд
Ба вақти жон супурдан деви малъун бар сарам ояд,
Зи чанги он лаъин ё раб ниғаҳ дори имонамро.

Надонам чан фасл бигзашт, ҳамоне хастаи хорам,
Вужудам бастаи имкон, аз дигар нест чизе борам,
Таважжуҳи дидорат ту умедворам, умед ёрам
Агар чанде гуноҳкорам умед аз раҳматат дорам,
Ба ҳаққи сайидул кавнайн ато кун он жаҳонамро.

Бурди оби баҳри ажуз тамоми иттилоъи буд,
Бар сари кўҳе ниҳода чор мурғаки Халили шуд,
Фигонеки, в-аз оҳанг аз Кўҳиқоф буромад дуд,
Ба ҳаққи зоти локи худ, ба ҳаққи ҳашт сифоти худ,
Даруни жаннатул маъво муяссар кун маконамро.

Хирқа аз касе пўшидан, Ҳижрат нури хирад дорам,
Жаҳонро пойхоки кардаам, базми сангин адаб дорам,
Харжи роҳ нашуда гаштаам, умеди ҳаққи Рабб дорам
Манам бечораи Жомий, умеди мағфират дорам,
Нигоҳ дор аз сақар ё Раб, ту жисми нотавонамро.

ТУШ

Юзинг ой-у, дулоқ гунча, сочинг занжир,
Қадди наврастангла ифор сочар жамбил.

Имо қилдинг, ҳимо қилдинг, адо қилдинг,
Ўзим ҳайрон, кўзим гирён, юрак қандил.

Уруш кўргон суворийдек жазм қилдим.
Манам силсилаи даврон, бироқ банд дил.

Булбулингман, санга банди бўлдим, э гул,
Оёқ - бошдин висолингга жами тадбил.

Валек гулмиҳда банддурман, тушовдурман,
Ажаб ишқнинг пайровидин вужуд тандир.

Бўлурми шунчалар қаттол, қаро бул туш,
Қаро терға тушубдирман зилу-замбил.

Калимамни бадастурлаб, хобни қувсам,
Боши болишимда хушқол ётар кампир.

СЎҚҚАБОШ

Сўққабош юргон эрдим, фармон бўлди ўзгача,
Тул бўлса ҳам тўй қилиб, уйланаман кузгача.

Тўтам топгон фаришта ду шавҳар кўргон эрмиш,
Оре, ору ҳаёси етар эрмиш қизгача.

Топар-тутарға гап йўқ, хат саводи бадастур,
Изн берсанг алифдин санар эрмиш юзгача.

Анга шавҳари мўмин, манға байтали чўбин,
Бўлса кифоят эрмиш, ўрин қолмас сўзгача.

Тўйдан олдин афтини кўрдиму ақлим озди,
Қаҳратон босиб кирди, юрак тушди музгача.

Онинг савтиға асли харидор эрмас эрдим,
Дордан қочғон ўғридай титроқ солди тизгача.

Ҳижрат хўрликдин қочиб Рўсиёға от солди,
Токи етолмай қолсун босиб кетғон изгача.

БАЙТАЛ

Наззора қилтур хурилиқо юзлари ял-ял,
Лаби гилос, кўзи чарос ёлқини машғал.

Бир ғамза усул қилғонида сўз қота қолдим,
Тўнкаға баҳо берғон каби эснади сал-пал.

Кўксимда кўпуб ғавғо, саёқ итча жунунлиғ,
Изиға тушиб йўрғаладим солмази пайсал.

Ковуши хиром этғонида зарби юракда,
Чиқмоқ истаюр гардишидин боқса у ҳар гал.

Бир жойға етуб тилпонини банди гўш этди,
Кўзимни қилиб олма-кесак айлади маҳтал.

Рағбат қилодур манға дебон йўлиға чиқсам,
Кўзида ажал чақмоғила тўсди бир анбал.

Қопқонға хуруж қилғонини билди камина,
Авровға тушиб, қоматидин тиклади ҳайкал.

Барзанги келиб товонини кунфуға тутди.
Тумшук домига муштумини айлади сайқал.

Гирдимда кўпиб бир нечаси картмонни шилди,
Алқисса вале итмомиға етди бу жанжал.

Бир жойға етиб ёши расо бўлмади Ҳижрат
Картмонға кўшиб носкадини хиртлади байтал.

ТАЖАНГЛАБ

Хаддин кўпаймуш элда юрғон турфа саганглаб,
Ўсал қилмуш авомни қорин-қиндик яланглаб.

Бул жонивор байталмон, қай охурда боқилғон,
Шайтонни ҳам танг қилди орқа-олди таранглаб.

Ҳар томда бир ликопча, комиға олур дажжол,
Ёшу пирни жимонға банд қилодур хаданглаб.

Кўча-қўйда аҳли шарр изо чекар шармдан,
Текин томоша қўпди, кўзлар аланг-жалаб.

Қизлар интўрқовоқлаб маҳрам излар жапондин.
Завжалар тилпон қоқур олмон, қурё, паранглаб.

Давр жабридин лолу гунг, раммолчи ҳам фироқда,
Осмон туби тубсиз чоҳ, замин борур заранглаб.

Таҳоратни бузмай, деб хонанишиндур Ҳижрат,
Бўза ичиб мушгини газак қилди тажанглаб.

БИТҚАЗИБ

Замона шундоқ бўлди, ҳеч ким боқмас ётқазиб,
Русиёми Амриқо, тутмайди нон ўтқазиб.

Қайға борсанг бир хилда хўроз макён излайди,
Санға хўрозқандини биров қўймай тутқазиб.

Неча-неча санамлар солур ўзни бозорға,
Энагуллар кун кўрар баданларни сотқазиб.

Олий кошоналарға кўпам суқланиб боқма.
Мардикор олур ақча тизни лойға ботқазиб.

Бир ёлғонда қирқ ёлғон важ қилмасанг миждозга,
Бэрбод бўлур тижорат бор-будингни ютқазиб.

Ўғри, муртад бўлмағил, замонға боқ, ишни тут,
Пешоб қилсанг масжидға ҳеч ким олмас қутқазиб

Авжинг борида Ҳижрат Тошканд сори азм қил,
Чала қолғон уйингни кимса бермас битқазиб.

СУЛТОНИМИЗ

Пешласак зоту насаб, кўҳинур вулқонимиз,
Аслимиз давлат талаб кашмири султонимиз.

Нақлимиз шамшири тиг, захридин кимса хароб,
Ҳар нафасда минг калом домани ултонимиз.

Бизға мойил жумла зот кўшкимиз арконида,
Бизға дўст бўлғон ҳабиб меҳриға жазмонимиз.

Пул сирот-ул мустақим манзили биздан ўтур,
Кимға дўзах оташи, кимға ҳур - филмонимиз.

Қўл етурсак қай томон, кўкка қадар илкимиз,
Шайтонға ўқир такбир ердаги фармонимиз.

Аҳли химор удуми бадастури сонийдур,
Не-не ақли пешларни аврагай чилтонимиз.

Лавҳул маҳфузни ўқуб, таворихни тафтиш қил,
Ҳом ибн Нуҳ наслидин тарқаган мўлтонимиз.

ҒАРОВ

Битмаган маърака йўқ топсанг қалов,
Тафти меҳринг ўтиға пишғай палов.

Дўсту ёронлараро мардлик улуғ.
Шаҳди йўқ дил гирдини босғай қиров.

Ҳосилинг мақсудига кутсанг кўмак,
Дардинга малҳам бўлмас ас биров.

Гарчи орзу кўшқида авжинг барор,
Вақт юки бошинг эгиб солгай буоров.

Сағринга ургай эгэр ўжар ҳаёт,
Сал қадам қалтис эса тортгай жилов.

Ҳар нафас ҳикматини ўлчовда бор.
Ҳар ишинг ажри учун бўлгай сўров.

Бандани қўйма маломат доғига
Ҳар киши жабри учун бордир тўлов.

Бошинга Ҳижрат шўриш солса рақиб,
Садрини суннат билу айла ғаров.

ЗИНДАГА

Алмиқсодан то абад бўлмас ишониб бандага.
Қанча мард андин сабаб қўйди бошини кундага.

Келмаса тазъбига мос, ўз ҳукмига тобеъ қилур,
Мўрчадай гирдинг олиб солгай танингни рандага.

Минг тазарру зимнида макру ҳамоқат устивор.
Зулмидан озурдасан юрсанг ўралиб жандага

Сал тирашсанг бошинга тўфони Нуҳни ёғдирур,
Чорасиз қолганда баъд, келгай мақоми саждага

Ўз талаби жаҳдида шайтон ила улфат бўлур.
Ширк ила мушрик ўлиб, иймонини сотгай муждага

Лафзи йўқ, рафтори йўқ, бозор бозиргони мисол,
Хурмалак мусичадай ўзини чоғлар соддага.

Илму эрк аҳли мудом чеккай жаҳолат жабрини,
Мушқулинг рўшнолиғи Ҳижрат садоға зиндага.

ҚУЁН БЎЛҒОН

Бул газитда ишлагоннинг азал ҳукми аён бўлғон,
Ё отилғон, ё сотилғон, ёки умри поён бўлғон.

Ўрис тўра лағат қилғон, ғарибларға мадад қилғон,
Бу шўришлар шилта тортиб, оқ пошшоға баён бўлғон.

Авом элға солиб ҳайрат, жадидларда қўпди ғайрат,
Дағи миллат орзусинда кўрки мулки Турон бўлғон.

Ўтди фурсат жарангтоси, битди қулик ибтидоси,
Эркини қутлаб нур-зиёси, умри пойдор, шоён бўлғон.

Вале айб этмангиз дўстлар, тўкисда бир қусур бўлса,
Анинг гирдинда кўп доно, дағи уч-тўрт пиён бўлғон.

Уён бўлғон, буён бўлғон, фойда бўлғон, зиён бўлғон,
Бироқ доим пайин қирқиб, чақурға бир чаён бўлғон.

Дағи қал бошға келмушқи, мағал бошида ким бўлса?
Балки, жаъми шўришларға сабаб мўрча миён бўлғон.

Хулоса шул: бу амалдин қутулғонға сўйиб жонлиқ,
Ўлиб-нетмай омон қолғон Ҳижрат қочиб қуён бўлғон.

ЎТДАН ҚЎЙМА

Ҳамал тафтини қўмсаб, ялдони ҳутдан қўйма,
Гуноҳ-савобни ўлчаб, Жаброни чўтдан қўйма.

Бомдод, шомни эш қилиб, тилни ғулға хеш қилиб,
Муслимликни пеш қилиб, насрони бутдан қўйма.

Иймон қўнгил қўрғони, олчоқ замон кайвони,
Бўлма кибр қурбони, чехрангни қутдан қўйма.

Обид яралди шайтон, Одамга солди пайкон,
Зинога тўлди аркон, тўфонни Нухдан қўйма.

Алмисоқ дунё соқий, бўлмагай умр боқий,
Хоҳ кимхоб, хоҳ жанда кий, наслингни юртдан қўйма.

Ҳижрат айтмас билмаса, қул ризқлидир ўлмаса.
Минишни эплолмасанг, эшшакни ўтдан қўйма.

ҲАЁТ – ҲИКМАТ

Ҳаёт – ҳикмат, ҳар қадамни ташла англаб,
Алдов ила ўз умрингни қўйма танглаб.

Ҳақ сўзингни хиёнатга раво қилма,
Алал-охир. санга ажрин берар жамлаб.

Бир фаслдир бошинг узра қуёш тафти,
Тадорик кўр, ёзда қишга ўтин ғамлаб.

Эсинг борда этакни йиғ, расолиқда,
Эрга бир кун доғда юрма, кўзни намлаб.

Акасроқ юр, файри ахлоқ, шитобравдин,
Дунё дажжол доми янглиғ ютар ямлаб.

Тарозуга посанги бўл, тошни пешла,
Зўр қувса қоч, ёв қочса қув, йўлни чанглаб.

Деди Ҳижрат, қилма нолиш толеъингдин,
Ўзга кампир санга бермас чойни дамлаб.

ЧИРМАНДА КЎП

Тўй бошласанг, базмга талабгор чирманда кўп,
Ҳосилинг баравж бўлса, харидор хирмонда кўп.

Яратгон ёрлақаса, бошингга қўнғай хумо,
Бу дунда лошни судраб юргувчи шўрмонда кўп.

Моли мардумхўр бўлма, маломат арконида,
Ҳаққи ҳалолнинг авло билгувчи давронда кўп.

Шикоринг жайрон бўлса, Фиротдек тулпор танла,
Ўлакса гўшт исини олгувчи ўрмонда кўп.

Сўзни сукутга еткур, мисқоли тиллога тенг.
Аҳволидан беҳабар кулгувчи шарманда кўп.

Кўнгил гаштини мудом чароғи Осиё қил,
Хушқалом улфату ёр, ой юзи ширмонда кўп.

Итинг мижози, Ҳижрат, ўзингга аён асли,
Бўзага хумор бўлсанг, ақчага зормонда кўп.

БОРМАҒОН ЯХШИ

Айтилмағон жойларга симсиб бормағон яхши,
Дуч келғон дардисарга дардни ёрмағон яхши.

Ҳурматинг бисёр жойда тавозеъни баланд қил.
Қадринг бўлмағон жойда ётиб-турмағон яхши.

Яхши кўшни эл бўлур, жонга оро ҳар дами,
Ҳамсоянг баттол бўлса, кулба қурмағон яхши.

Ўлакса излар кузгун, бургутга тенг бўлолмас.
Тулки, қашқирлар бирла сайдга юрмағон яхши.

Ҳар усулға йўрғалаб қалтак егандан кўра,
Уч-тўрт улфат жам бўлиб, қозон кавлағон яхши.

Гирдингда олиб давра, итлар ҳуриб турғонда,
Ҳолинг танг бўлса магар, бирга ҳовлағон яхши.

Ҳижрато, дарвиш бўлсанг, кимни санға иши бор,
Бир парини ром қилиб, кўнгил овлағон яхши.

ЕТИШМАЙДИ

Елкамизда ҳадди лаврон, бизга лаҳза етишмайди,
Қаршимизда боғи ризвон, вале, пайса етишмайди.

Ороланур субҳи жонон, қуёш қўкда урар хандон,
Ўтиб борар умр чандон, шамъи ғамза етишмайди
Авжиладур гапу гаштак, пойимизда боғу даштак,
Хуш бўлишга дағи гартак васли равза етишмайди.

Баҳор қайтиб кузак бўлди, асо қўлга безак бўлди,
Насимлар елвизак бўлди, боди сабза етишмайди.

Қайда энди алвон гилам, ҳимоланган нозли санам,
Хазон фасли яшил олам, гиёҳ-майса етишмайди.

Ҳижрат, ҳужранг равог бўлди, рақибинг дон Кихот бўлди,
Ортингдан сот-ҳа сот бўлди, санга найза етишмайди.

НИМА ЁЗАР?

Қўй терида бир семириб, неча озар,
Азал ҳукми тақдирингга нима ёзар?

Бўлар элнинг болалари дарддош бўлар,
Бир-бирига елка тутиб, кенгаш тузар.

Бўлмас элнинг болалари бебош бўлар,
Бир-бирига тараф тортиб, юртни бузар.

Қўй семирса осилғайдур оёқиндин,
Қул семирса дуч келгани шохлаб сузар.

Тўралари таъма билан тўр солади,
Аҳли авом қайга борса танга чўзар.

Товламачи товлаб олар, юлғич юлиб.
Токи рўзи маҳшаргача қарзни узар.

На молинг, на мартабанг бор, магар Ҳижрат,
Вале, ҳар дам тегранг узра ташла назар.

Узоқроқ юр бу қинтоблар шўришидан,
Яқинлашсанг, ўлмасингдан даҳма қазар.

ДАЪВО БЎЛАКЧА

Коши қаро, қадди бало, даъво бўлакча,
Ўзи кату таъби боло, ғавғо бўлакча.

Қайга борса гўдаяди ҳайкали мумтоз,
Тўтимижоз савту сухан маъно бўлакча.

Атрофида лайчалари - шотиру ботир.
Сув сепади, гул экади, раъно бўлакча.

Қилки фикр, тинглар они тўда гўсола,
Гўшидаги лодону гўр, доно бўлакча.

Жазавада ўлдиради турқи буқани,
Ҳукми магар етса бўлур жавзо бўлакча.

Эл кўзича лоф уради ғамхори бардор,
Эл кўзидан шамғалати савдо бўлакча.

Ҳижрат деди сув бошида тоқай бу ҳаннос,
Фитна кўпиб бир кун бўлур расво бўлакча.

ЛАГАНБАРДОР

Нечук бунча бу шўр мардум ўч пахтага,
Чунки бари чиқмоқ истар сартахтага.

Бандға тортиб ўнгу сўлни тўғон қилур,
Бир қарашда ўхшаб кетар иш пухтага.

Ширин авраб олар сирни, топар кирни,
Сўнгра сени алдаб кетар уч қартага.

Гап юргизар, гийбат қилар, туҳмат қилар.
Тумшуғингни келтиради дуч нўхтага.

Қўндоғида танглайига қаро тушган,
Энди тинмас тортилгунча чортахтага.

Бу каждумлар тоқайгача солур гавғо,
Томчи тошни ўяр тушса бир нуқтага.

Ҳижрат, носни зое қилма, бетига бос,
Сўнг пешоб қил, бу ҳам камдир гўрсўхтага.

ВАҚТИНЧАЛИК

Кўпириб ҳов-ҳовлағон авутинг вақтинчалик,
Сиртига жез қоплағон совутинг вақтинчалик.

Неки бор. ўткинчидир, савдон давворада,
Елкангда ялтиллағон мовутинг вақтинчалик.

Арконинг олиймақом, пойингда тўртта ғулом,
Кўҳинурға менгзағон ёқутинг вақтинчалик.

Ҳаромдин қилмай ҳазар, юғғоним авло дединг,
Қаҳратонда гуллағон шотутинг вақтинчалик.

Ҳаддинги такрори йўқ, ҳукминга ой мунтазир.
Ҳирс ила дағи солғон човутинг вақтинчалик.

Очиқ кетғон чашмни тўлдирур бир кафт тупроқ.
Елиб-йўртиб топғонинг, бор-будини вақтинчалик.

Оре, гуноҳкор Ҳижрат, ўзинг тавфиқ ато эт,
Сўнгни йўлга кетурда тобутинг вақтинчалик.

ИЧБУРМАСИ

Қилди ўсал капталаган ичсурмаси,
Исқаъжага олди тамом ичбурмаси.

Моки бўлдим икки ҳужра аросинда,
Ҳолохона бўлди фақир тоштурмаси.

Наша урдим, рўза тутдим, давоси йўқ,
Етмай қолди "Капитал"нинг устқуртмаси.

Сўнг эсладим: қайдан қўлди балоий жон,
Ични бузган балки бозор қовурмаси.

Озиб-тўздим ҳафта ичра ҳинду чолдек,
Бўртиб қолди аканг қўқир ковурусаси.

Нўш қилувдик омухтада ҳар сабилдин,
Балки дилга ботмағондур шовурмаси.

Текин таом тешиб чиқар, аё Ҳижрат,
Нафсинг тийиб, табибга бор кеч бўлмаси.

ИШКАЛ

Қичимаси бошдин-товон қилди ўсал,
Фақир мулзам, қамровига олди касал.

Бошдин ўтғон билур бу дард нелигини,
Моматалоқ тери туси бўлди дағал.

Қашламадан дўмбирадай шишди бадан,
Тўшак ботар босилғондай тўрт қоп шағал.

Бу ҳолима дўсту ағёр кулар бўлди,
Ғалат дардга даво истаб қилдим жадал.

Садоқаға улоқни хомталаш қилдим,
Ҳасан табиб жонга оро кирди сағал.

Қай гуноҳим мани бундоқ кўйга солди,
Чилла тортиб ўлтирғоним бўлди бадал.

Не тановул қилди Ҳижрат, бунча ишқал,
Аламини майдин олиб битди ғазал.

УЙ МОЖАРОСИ

Отам замон бир кулба қурғон эдим амаллаб,
Жами ёру биродар берғон эди тамаллаб.

Пахса уриб, лой тепиб, озиб-тўздим тозидай,
Чала қолғон деворни суваб чиқдим жадаллаб.

Олис сафар чоғинда уйни қўйдим қаровга,
Муддат ўтиб маконга қайтдим анча ҳаяллаб.

Дарвозадин қўймади банд айлағон бир байтал,
Гаврон олиб қувлади бақир-чақир, мағаллаб.

Занон деди, бу кулба харид бўлғон маҳримга,
Ақча тўлаб муздини манга берғон қамаллаб.

Дуруқ гапзада қилма, десам ёлни ётқазиб,
Фақирни мулзам қилиб, қағоз ёзди ғарамлаб.

Кўклам ўтди, қавс ўтди, саёқ итдек кўним йўқ,
Кулбани можароси кетди алламаҳаллаб.

Ҳижрат, уйинг важҳидин умринг ўтур кўноқда,
Уриб турғил бўзадин, тағин қолма шамоллаб.

ШИЙПОН

Аё дўстлар, турар манзил бўлди шийпон,
Гир тарафи хувиллағон очиқ майдон.

Унда яшар тўртта мардак, икки кўппак.
Фақирда ҳам якка хужра, дағи айвон.

Қантариғлиқ турар бунда турфа ашё,
Икки тулпор, аъроба-ю қўшша файтон.

Бардо қўшиб терт қоради нўғой мардак,
Бўрдоқига етилади тўртта ҳайвон.

На юришда, на туришда ҳаловат бор,
Саҳармардон чиқиб қайтғум қилиб хуфтон.

Токай давом этгай экан бу сарсонлиқ,
Жонга тегмиш кунда шунда бўлиш меҳмон.

Ҳижрат, сабр адоғинда ёруғлиқ бор,
Бир кун келиб, кулбангни тарк этар шайтон.

БОЗИНГГА БОЗ

Билмадимки, қай хунасо қилди зуғум,
Ман кутмағон пистирмадин бўлди ҳужум.

Ойни нисби қаро бўлса, нисби ёрқин,
Демуш таскин бериб дилға аҳли нужум.

Исковучдек тафтиш этди мани ағёр,
Лойға қормоқ жаҳди бўлди икки юзум.

Жаъми тадбил бўлур воқеъ ҳаққу ҳолдин,
Феъли сакбин зери подин бўлди ғужум.

Фалокатдин холи бўлғон фақир хушҳол,
Бўй бермағон ишкомида қолди узум.

Мандан не важ топди тўнгбош тўнни тинтиб,
Бир белбоққа жо бўлодир бору йўғум.

Ҳижрат Або Муслим киби солди сурон,
Бозингга боз, ғуррагинга дебдур муғум.

РАУФ ПАРФИ ЁДИ

Уриб турган юрак зарби,
Беҳаловат шоир қалби,
Алифбонинг қутлуғ ҳарфи —
Тимсолидир Рауф Парфи.

Замин-замон қўлкасида,
Сўз залвори елкасида,
Туркий олам ўлкасида
Ҳилолидир Рауф Парфи.

Сўзи шамшир каби кесган,
Кўнгли тоғлар каби ўсган,
Ҳурриятнинг сарин эсган
Шамолидир Рауф Парфи.

Шеърятга пайваста тил,
Раиятга вобаста дил,
Ишқ аҳлига мисли Бедил —
Ниҳолидир Рауф Парфи.

Ёнар сўзи асл чақмоқ,
Сатрлари яшил япроқ,
Қўналғаси она тупроқ,
Зилолидир Рауф Парфи.

Ҳаёт билан ҳақиқатнинг,
Баёт билан тариқатнинг,
Шойистаю ғариқатнинг
Висолидир Рауф Парфи.

Аҳли улус далолати,
Калимаи шаҳолати,
Тирикликнинг ибодати —
Саволидир Рауф Парфи.

ЭТАКНИ ТОРТ

Бир мажалла манға хидмат раво кўрмуш,
Фидо бўлсам, фаровонлиқ бўлур турмуш.

Каломда шундайин келмуш, корда айб йўқ,
Шитоб қилдим, авжим барор, ишим юрмуш.

Сунбула-ю мезон ўтди рўшноликда,
Дигар баъдаз чархи фалак юзин бурмуш.

Демушларким, бу қандоқ кас, келгон чаро,
Турфа гап-сўз ила бошлиқ изо бермуш.

Фитна-ғийбат тугаб эрмай ҳали бундоқ,
Кўчабошда дайди кўппак манға ҳурмуш.

Карвон ўтур, учрагон ит ҳурғай десам,
Бу карвонни тарк этмасам, алар зўрмуш.

Лошим суриб кетар бўлсам, кўчам ойдин,
Магар ҳар кўйга солғаймуш, тили бирмуш.

Деди Ҳижрат, эсинг борда этакни торт,
Толёингда қуёш бўлса, кўпдир юмуш.

ЮЛДУЗИМНИ ИЗЛАДИМ

Бул фано туфроқида ҳур сўзимни изладим,
Ул само яфроқида ой юзимни изладим.

Шикаста дилман гирён, ҳажрида бўлдим сарсон,
Шакарғуфтори бийрон, ёлғизимни изладим.

Танимга тушмиш савдо, жунбушга келмиш гавго,
Чарх уриб фасли ялдо, кундузимни изладим.

Муштарий бунча йироқ, ҳилол кўкдаги сўроқ,
Кўксимга тушди фироқ, юлдузимни изладим.

Пайкондек камон ёйга, умримиз кўяр пойга,
Келиб кетурмиз қайга, дил розимни изладим.

Насимдир хуш ифори, дилни ўртар хумори,
Кўксимда ишқ тумори, ялпизимни изладим.

Ҳижрат дер жунун ичра, минг турфа қонун ичра.
Ул чархи гардун ичра мен ўзимни изладим.

ШОИРДАН НЕ ОЛАСАН?

Фаввонг оламни бузар, шовқинга тўлди гузар,
Бунча от солиб хумпар, шоирдан не оласан?

Жанггоҳга дўнди майдон, ёғдирдинг турфа пайкон,
Лули рафторли шайтон, шоирдан не оласан?

Сандек номдор сўқим йўқ, фаросатда муқим йўқ,
Елкангда бир тўқим йўқ, шоирдан не оласан?

Мол-амалдан кўп таъманг, гоҳ хўжасан, гоҳ маззанг,
Бисёр кўрсатган нағманг, шоирдан не оласан?

Ваъз ўқийсан вадаванг, қуруқ чопар араванг,
Жонга тегди жазаванг, шоирдан не оласан?

Ҳашам-маншат тайин, семирасан кун сайин,
Сенга жон бермоқ қийин, шоирдан не оласан?

Бирлашса уч-гўрт нодон, оқилни қилур сарсон,
Таловда қолур карвон, шоирдан не оласан?

Худодан шафиқ тила, ўзингга тавфиқ тила,
Куйган охират ила, шоирдан не оласан?

Ҳижрат сабрида муқим, ёр ишқида йўқ ҳукм,
Ундан ўзга йўқ юким, шоирдан не оласан?!

ҚИСМАСИН

Мартабанг бўлмас магар, энү бўйдан қисмасин,
Даблабанг бўлмас эса, рангу рўйдан қисмасин.

Мол йиғиб, мансаб қувиб, хилқатинг шаъми адо,
Улфату бир кафтча ош. нону чойдан қисмасин.

Қанча олсанг рафтани, вазнидан елканг яғир,
Дунё-ю-дарёни қўй, жилға-сойдан қисмасин.

Юрма хушторлиқ ила, банди по ҳар риштаси,
Ул чаман гулзор аро, қоши ёйдан қисмасин.

Хур туғилдинг, хур сўзинг хок аро саргашгадир,
Қир-адирлар лоласи, жону жойдан қисмасин.

Шул ёруғ олам аро умридин ўтсин ризо,
Бандаи давворани баэму тўйдан қисмасин.

Ҳижрат гуноҳкор банданг, ажри эмди не бўлур,
Охиратда икки газ хоку пойдан қисмасин.

ДУРУСТ

Аввало ҳар кимса ўз қадрига етган дуруст,
Қадрини топмас эса, даврадан кетган дуруст.

Ҳар мақомда от суриб, бози чавгон бўлмағил,
Зукко бир ақли расо липласин тутган дуруст.

Тўрт мучанг бўлса тугал, жаҳд қилиб ризқингни йиғ,
Топганинг оши ҳалол, луқмани ютган дуруст.

Нотавон иснод ила чапласа шаънингга доғ,
Шайламай шамширу тиг, охирин кутган дуруст.

Хонадор бўлсанг магар тақдири рўшно тила,
Гушна бўлгандан кўра, беҳотин ўтган дуруст.

Гирдига олса тамом йиғнашиб турфа авом,
Оғзига айри солиб, ортидан тепган дуруст.

Жонсарақ жоҳилни қўй, ҳақ жазоси бор анга,
Ҳижрато ундан кўра машқини битган дуруст.

ДОВДИР ҚИЛУР

Ҳаққи ҳозик неки қилса, ҳалдини соҳир қилур,
Қатрага оламини жамлаб, мўъжиза содир қилур.

Бандаси алдов-хиёнат комида комрон яшар,
Сиртига сийратни жуфтлаб, афтида зоҳир қилур.

Юз қароликдан ёмон йўқ аҳли иймон олдида,
Аъмолида неки бўлса, шаънига носир қилур.

Гаввораи чархи даврон измидан айро эмас,
Яхшига раҳматни пешлаб собиру моҳир қилур.

Минг балолиғлар ичинда созлагай пайровини,
"Ал ҳаё-ю минал иймон" шаклини чодир қилур.

Асли наслида некбинлик зуҳри йўқ шайтон касе,
Чалғитиб муслимни диндан қотилу копир қилур.

Магар турқида кўрк бўлса, аъмолида баъд жимо,
Ато айлаб тугал давлат, бир хато қосир қилур.

Ҳукми аро не хатолик хасмига раво бўлди.
Токай эмди аҳли ҳаннос Ҳижратни довдир қилур?

ТАРОЗУ

Яратган тарозуға шайин қилиб қўйипти,
Ҳар банда аъмолини тайин қилиб қўйипти.

Иймон умр қўрғони. олган бўлсанг дуони,
Йўлингга гуллар тўшаб, майин қилиб қўйипти.

Ҳар ким қилгай ўзига, нуқси ургаи юзига.
Нобакорни шайтону лаъин қилиб қўйипти.

Халқи бешумор даврон, биров тунд. биров комрон.
Телба-ю девонани раъйин қилиб қўйипти.

Кимга ризқу рўз берган, кимга парча бўз берган,
Бировга давлат бериб, камин қилиб қўйипти.

Фариқани раҳматни, шойистани жаннатни,
Аросату дўзахни таъмин қилиб қўйипти.

Ҳижрат, қай бир йўлдасан, на соғу на телбасан,
Азал феъли-ҳўйингни гамин қилиб қўйипти.

БАРАКАДАЙ

Ўтиб борар умр ботмон баракадай,
Ҳар субҳи-ином мисли сўнгги маъракадай.

Ичдинг, чекдинг, саёқ юрдинг. ялло қилдинг,
Кўркинг кетиб, тананг қотди тарашадай.

Яхши кўрдинг, ёмон кўрдинг, ризқни тердинг,
Неки қилдинг, аҳвол шунга ярашадай.

Ота-онанг бағрида шод-хандон эдинг,
Фадлор ҳаёт сихга тортди баррачадай.

Алиф қаддинг букди рўзғори мағфора,
Адо қилди жуфтинг ўтмас аррачадай.

Қайдан келиб қайга кетар қадим карвон,
Тахир тақдир гуйнуғи йўқ дарачадай.

Тўзон бўлдинг, хазон бўлдинг, магар билдинг,
Фалак измида ҳукминг йўқ заррачадай.

На май қолди, на сафоси, бўлиб ҳайрон,
Ҳижрат турар тўрт томони чорраҳадай.

ҒАНИМАТ

Булбули садпорага гулиузор ғанимат.
Ошиқи давворага рўйи гулзор ғанимат.

Шукуфта наззора бўл, гардунда сайёра бўл,
Марду-майдонлар аро дўсту дийдор ғанимат.

Ҳикмат бил ҳар нафасни, баҳри мўъжиза асли,
Бешумор мардум аро лайли наҳор ғанимат.

Бу қудрат аёнига, гувоҳ йўқ поёнига,
Изоҳ йўқ баёнига, васли дилдор ғанимат.

Ҳабибга ошно азиз, нияти рўшно азиз,
Улфату ёр аҳлига аҳли рафтор ғанимат.

Кўргил, яралдинг надан, ҳар жон омонат маъдан,
Баҳри уммул ичинда васфи жаббор ғанимат.

Ҳижрат майдин шикаста, ичмоқни қилди баста,
Лаъли лабингдан жоно, шакарғуфтор ғанимат.

ЧИРОҚ ЭРМИШ

Тушимда кўринган ул ой чироқ эрмиш.
Ҳали навраста қадди ёй уроқ эрмиш.

Лавҳул маҳфуз садосиға кулоқ тутсам,
Бани одам умри қуроқ-қуроқ эрмиш.

Заминдин то гардун қадар қамар янглиғ,
Тажаллий нурида балққан Буроқ эрмиш.

Калом илмига ҳад солмоқ азоб асли,
Қўлимда ҳар лафзи шамшир - яроқ эрмиш.

Ёнимда солланиб турмиш малаксиймбар,
Анга жоним зебигардон, тароқ эрмиш.

Қаро тортиб ғалат тушдан кўзин очса,
Ҳижратга суйқаниб турган бароқ эрмиш.

ЭЙ ГУЛ

Иккимизга эй гул. кўшқу равоқ бўлса,
Хилвағнишин май-у тансиқ таом бўлса.

Чучмомалар кулиб ўпса кўзларингдан,
Қизғалдоқлар чеҳранг узра ёноқ бўлса.

Сархуш ўлсам мушки анбар бўйларингдан,
Бошимизда юлдузлардан чироқ бўлса.

Сийпаб ўтса сочларингни сарин эпкин,
Бизга алёр айтган майса, қиёқ бўлса.

Булбули хониши янглиғ юрак куйлаб,
Қўлингдан ичғали майгун дудоқ бўлса.

Ипқи оташ жавҳаридин ташна кўнгил,
Таранг тортилган ёй, пайкон сазоқ бўлса.

Шу байтни битди-ю Ҳижрат толди ўйга,
Қочар қайга хотин қўйган тузоқ бўлса.

ТОПИЛМАЙДУР

Замона саҳида рострав сотилмайду,
Йўлини топгани эплаб отилмайду.

Сен-эй лодон, манга айтма ширин ёлғон,
Яхши одам тўғри гапни шопирмайду.

Фалончининг феъли ганда, жиним суймас,
Мани лафзимга мудом терс, қўшилмайду.

Кимни кўрса, оғиб кетгай фалон лақма,
Фалончи зўр, манга қарши гапирмайду.

Фалончини заданг сўқдим, лами чиқмас,
Жилла бўлса, муштлашишга чақирмайду.

Фалон байтал айғиридан қолмиш сабил,
Фалончини сигири ҳеч бақирмайду.

Фалон ўлпоқ, фалон сўлпоқ, фалон маймоқ,
Боз устига дарвозаси ёпилмайду.

Гапимни тинглагил лодон, мудровни қўй,
Мани сўзимни олган кас қоқилмайду.

Гапимга гар боваринг йўқ, сўра мандан,
Магар биздек марду майдон топилмайду.

МАРҲАБО

Фурбатда ғариб ўлсанг, чехранг бўлур қахрабо,
Ватанда ҳабиб ўлғай хешу улфат, ақрабо.

Ишқи оташ жаҳдида ул мунтаҳо на бўлғай,
Ёр васлиға етишди дийдор истаб Машрабо.

Иброҳим қурғон ул уй Каъбаи муаззама,
Каъба қурма, кўнгил топ, шудир эзгу матлабо.

Пули сиротдир асли тириклик чағиртоши,
Бандаи ношукурни муслим қилур чархлабо.

Жаннат эшигин истаб аросат қюнида,
Муздини тўлолмассан бор мулкингни нархлабо.

Ҳар сониянг, ҳар лаҳзанг рушди ҳидоят ўлсин,
Хурлар хидматда бўлур иймонингни сақлабо.

Боқий жиҳодда дуйно шайтону раҳмон ила,
Одамни азиз қилди лавҳ ул-маҳфуз хатлабо.

Яхши-ёмон дам борки, бир кун топар интиҳо,
Ложарам, ўтғай бари, Ҳижрат кетдинг ўтлабо.

Қатраи дурдин сани нақши-нигор қилибдур,
Бу оламға келганинг қутлуғ бўлсин, мархабо!

ТАТАР ҚИЛМИШ

Азал соҳиблари шундоқ хабар қилмиш,
Жами махлуқлар сарварин башар қилмиш.

Бадарға бўлғон ул шайтон даме пойлаб,
Одам Ато орқасидин сафар қилмиш.

Уни қайраб, буни авраб сурон солмиш,
Бани одам ўртасинда хатар қилмиш.

Жами шўриш-у вовайло азал шундан,
Тириклик тафтини горат, батар қилмиш.

Тавбаға келмади банда бу аъмолдин,
Шайтонға ағдариб айбни бақар қилмиш.

Ўзиға хуш хуружлардин қилиб кўрган,
Қолғонини тамом наҳйи мункар қилмиш.

Этак силкиб қочди шайтон шгу важҳидин,
Шайтонға дарс бериб они фатар қилмиш.

Деди Ҳижрат, бул энағар қандай бало,
Бу бадхўйлар мани баттар татар қилмиш.

САВДОНИ КЎРИНГ

Қоматида нур ёнади, жилвони кўринг,
Бўйида гул уйғонади, ишвони кўринг.

Солланади соч сунбули ғамзада бот-бот,
Ман адо-и дод булбули, телбони кўринг.

Наргис кўзиға бўлдим изо настарин янглиғ,
Жонимға ўт солди ғизо, ғалвони кўринг.

Лола ила баҳслашади икки ёноғи,
Кош киприги жуфтлашади, хулвони кўринг.

Сув тутади қафтларида ғамзаи айёр,
Дил оқади тафтларида, жавзони кўринг.

Дудоғи гул хандонидур, шаққари маҳваш,
Нигоҳи дил зиндонидур, савдони кўринг.

Не хуружи бўлса Ҳижрат, ичидин ўтди,
Ишқини фош қилди сийрат, расвони кўринг.

ОТМАҒУНЧА

Чавандоз хавфни сезмас улоқда чопмағунча,
Кутурғон кўппак тинмас кимсани қопмағунча.

Шайтони рожийм нурдин бино бўлғон аслида,
Одамни бузди жаннат эшигин ёпмағунча.

Шундан бузилди қони маҳшаргача то абад,
Шайтоний усул қилур айвонда ётмағунча.

Билдирмагай кўнглини, бу тобутда не зоҳир,
Кучиб қадайдуր ханжар, суякка ботмағунча.

Кўрки, қул Аҳмад айтмиш, баттол кирдикор банда,
Кўнглига ором келмас, қавмини сотмағунча.

Кутмағил андин шафеъ, толеъи аламбардор,
Кирдикори шул эрур то ҳаром қотмағунча.

Ҳаргиз куйинма Ҳижрат, майхўрлик андин авло,
Ҳижрон ўтида жонинг, магар тонг отмағунча.

БИЛМАДИНГ ҲАҒГИЗ

Ўтли умринг жаҳолатда, сажлани билмадинг ҳаргиз,
Мудом юрдинг залолатда, бандани билмадинг ҳаргиз.

Меҳробинг бўлди мол-давлат, хиёнат, алдову савлат,
Иймонингни босди ғафлат, Каъбани билмадинг ҳаргиз.

Нафси амморадир кўшқинг, чархи давворадир ашқинг,
Саъби сайёрадир ишқинг, пардани билмадинг ҳаргиз,

Балоларга дучор бўлдинг, эл ичра шармисор бўлдинг,
Шайтонга мардикор бўлдинг, муждани билмадинг ҳаргиз.

Саълат кетиб соқов бўлдинг, ёлғиз яккамохов бўлдинг,
Асов эрдинг, косов бўлдинг, зарбани билмадинг ҳаргиз.

Мақоминг қирчанғи дўлта, ортингда қолди кўп шилта,
Бошингда хунхор ойболта, кундани билмадинг ҳаргиз.

Ношукурда қаноат йўқ, иймондан аъло давлат йўқ,
Ҳижрат кимда саодат йўқ, тавбага келмади ҳаргиз.

ЎРТАСИНДА

Бошингда қанча шўриш бор еру осмон ўртасида,
Ғалат ишларни кўриш бор, сару поён ўртасинда.

Ўз уйимга ўзим сиғмай, тўрт фасл дарбадар бўлдим,
Дағи итлар ҳуриб турди кўшқу зиндан ўртасинда.

Деди завжаи байталмон, бу уйни сотиб олгонман,
Мани маҳримга бош суқма, икки шайтон ўртасинда.

Қози-ю миршабга борғум, шаҳд ила сурҳо-сур қилғум,
Қўш бачамни кузур қилғум, олиб сотгон ўртасинда.

Кўринг эмди фақир ҳайрон, қози-миршаб ичра гирён,
Жангу мағал кўиши гўё япон-гирмон ўртасинда.

Ҳукмфармо қилди қози, ишга тушди тош-тарози,
Ким рози-ю ким норози, кулба қургон ўртасинда.

Деди завжа, қамал қилдинг, қозига ҳам амал қилдинг,
Мани зеру забар қилдинг, шубҳа-гумон ўртасинда.

Ҳижрат тавба қилди демай, ақча сочди сомса емай,
Ушбу қисса якун топди марду занон ўртасинда.

МАКР БАЁНИ

Калом етмас макри одам баёнига.
Панд беради етти фалак шайтониға.

Эпин топса ўт қалайди товонингга,
Яксон қилар дучор бўлсанг гумониға.

Фитна ила бўҳтон тўқиб иғво қилур,
Илон каби тортаверар домониға.

Оқил эрсанг, бугдойинга шерик бўлма.
Теринг шилиб, шерик қилар сомониға.

Тўғри сўзга туққанинг ҳам ёвлашади,
Солиб отар сани Аржун камониға.

Ер талашиб кўзи тўймас лўхтақбози,
Охир борар қаро ернинг оромиға.

Молу амал қутуртирар авбошини,
У ҳам бир кун тушар заққум маромиға.

Аъмолига ҳар ким олар Ҳақ ажрини,
Ҳақи ҳаққа, ҳаром тортар ҳаромиға.

Нафси жоҳил ичра адо бўлди банда,
Ғофил ўтди, етди умри поёниға.

КИМ БЎЛДИНГ?

Келиб дуйно севинчиға бамисли полапон бўлдинг,
Ажиб ҳайрат лисонида чароғи хонадон бўлдинг.

Фароғатда униб-ўсдинг, наволарга тўлди кўксинг,
Онқадар кўп эди дўстинг, ғунон бўлдинг, дўнон бўлдинг.

Ёшлигингга эдинг думбул, қиёфанг хуш, забон булбул,
Амал сартахтида дулдул, феъли кажрав қобон бўлдинг.

Шараф топдинг бўлиб думча, гаҳи дулча, гаҳи хумча,
Ишлатиб тешаю-лўмча, Рум ҳайсари юнон бўлдинг.

Восвосмисан, ҳанносмисан, олий ҳарамн хосмисан,
Қоқбошмисан, жунбошмисан, ботил макр жимон бўлдинг.

Рақибни ўнг келса отдинг, ўзингдан зўр келса сотдинг,
Аввал охир шул ҳаётинг ила бадном ёмон бўлдинг.

Деди Ҳижрат, шуми топган қадринг баҳоси, ким бўлдинг?
Фаришта чехрали шайтон маҳрида ломакон бўлдинг.

ҚАРЗДОР КЎРИНМА

Душманинг кўзига ночор кўринма,
Ёвни дўст қилишга зинҳор уринма.

Дўсти содиқликда ўзингдан пеш йўқ,
Кимсага ёвлашиб, гаддор кўринма.

Шайтон зикридаги мулойим яғмо,
Кўзимга фаришта рафтор кўринма.

Кўргил, ҳар гиёҳнинг ўз меҳробн бор,
Гулга озор бериб, хунҳор кўринма.

Нафсга тақво қилиб, оҳордан қолдинг,
Пешво пешбандида зуннор кўринма.

Ҳаромга урчитма умринг тафтнини,
Жаҳолат кўшқида бардор кўринма.

Искандар маёғи гарчи мақоминг,
Гуноҳқор бандага жаббор кўринма.

Ҳақдан жон қарзини такомил айла,
Фано бўстониға қарздор кўринма!

ЗАКОТИМДА

Қочди ором, қолди умрим талотўмда,
Жоним ҳалак. итлар изғир равотимда.

Абутуроб бўлдим ватан ҳижратинда,
Ғавсулаъзам сукути бор саботимда

Кулоқ тутсам, дилим сокин сабр ичра,
Самандарқуш тафти гулхан қанотимда.

Неки кечса, ўтди байтул гузоримдан,
Шарҳи баён рўзи қалам-давотимда.

Кул ўлмаса, ризқи бисёр фано ичра,
Яратганнинг ажри сарқор нажотимда.

Сен эй дажжол, рафторингда аён макринг,
Бадр жанги шиддати бор ғазотимда.

Банда қанча жабр кўрса, шунча ҳурдир,
Салаф янглиғ тоқатим бор закотимда.

НОЛИМА

Кўнглингга озор етурса, ул кишидан нолима,
Тийнати олуда оғу олқишидан нолима.

Издихом рўзинда тақво, мулкида такбир риё,
Турланар турли усулда, ранг-тусидан нолима.

Искандар ойинасидан толеъингга йўқ нажот,
Фитнакор қурбони қисмат кўзгусидан нолима.

Учраса нокас йўлингда, устихонингни ғажир,
Нафсида аждар мақоми, улгусидан нолима.

Зоҳири дўстона дилхуш, кўз қарошида фидо,
Хислати макрида пинҳон, кулгусидан нолима.

Ёвлашур гирдингда яғмо, кўр жаҳолат базмини,
Аъмоли қирчанғи ҳиммор тепкисидан нолима.

Гарчи кўп ноқислик Ҳижрат, бу ғалат сайёрада,
Қашқири бисёр чаманда тулкисидан нолима.

ТЎФОНИДАН

Неча сув тўфонида қолмиш бу дар бухронидан,
Неча қавм ўт комида ёнмиш башар куфронидан.

Нух набий ўз қавмини минг йилча даъват айлади.
Саксони муслим ўлиб, жон сақламиш тўфонидан.

Паҳлавон Маҳмуд каби жоним синов гирдобида,
Гарчи Нух эрмасди ул, минг тўфон ўтди жонидан.

Мулки ҳаррос ҳирсида Қорунни ер югмиш тирик,
Мосуво бўлди авом, баднафс ила иймонидан.

Бўлма бунча жонсарак, жоҳил учун инсоф тилаб,
Тавбага келмас ҳариф, қўрқмай ажал зиндонидан.

Сару по қузғун миждоз, иблис билан вобастадир,
Оқибат жон муздани қилгай талаб қурбонидан.

Чекинур зулмат бадар, Ҳижрат қуёшли кун улуғ,
Минг тўфон бўлса магар, ўтгай чақин Яздонидан.

ТҰНКАЛАР

Икки жоқит бирлашса, битта оқил янчилар,
Яхши кўнгил кирлашса, елкангга тиг санчилар.

Сал бўш кўйсанг жировни, эгарлайди уловни,
Жонга солар буровни, шайтонга малайчалар.

Чағир кўзи қонталаш, қилар сенга ёвқараш,
Гўштинг бўлар хомталаш, сўнгагингни парчалар.

Жин чиққандай тиқиндан, аврар узоқ яқиндан,
Даф қилмасанг биқиндан очар алҳол дарчалар.

Босим қилар рўзингга. мил тортади кўзингга,
Кун бермайди ўзингга отин бўлган ғарчалар.

Қайга борса довуллаб, йўл топади совунлаб,
Атрофида жовуллаб ҳуриб турар лайчалар.

Ранги ўлакса бенур, дами кўланса гўсхўр,
Ошнаси шайтон эрур даъюс рафтор нарчалар.

Ичи қурум ҳасаддан, фитна анқир жасаддан,
Чиққан каби лаҳаддан кекирдаги найчалар.

Рост гапни ёлғон қилар, ошингни ёғон қилар,
Қулоққа лағмон илар ҳанграб юрган харчалар.

Токайгача тилкалар бу танингни тўнкалар,
Ҳижрат, кўйсанг елкалар ватанингни мўрчалар.

БАҲРИ ИШҚ

Ҳозиқу ҳамёрасан, шавкатингдан, баҳри ишқ,
Бенасиб қилма мани, раҳматингдан, баҳри ишқ.

Аҳроринг хуррияту хоссатил-хосса мақом,
Ҳар тўқисда ёр зуҳур, санъатингдан, баҳри ишқ.

Ўн секиз минг мамолик дайр аро ҳукмингдадур,
Ҳар гиёҳ, ҳар сабзага заҳматингдан, баҳри ишқ.

Жумлаи ажри вафо мулкида сидрат ниҳон,
Бандани тутма дариг, шафқатингдан, баҳри ишқ.

От суриб майдон аро фарзни банд этмиш сипоҳ,
Гардида шоҳ танг эмиш, шоҳмотингдан, баҳри ишқ.

Кавкабингда минг фано, раҳматингда бир бақо,
Дил тажаллий ғарқида, талъатингдан, баҳри ишқ.

Тобакай Ҳижрат қарам бўлғуси хотуниға,
Бошиға ёғдир патир, чалпакингдан, баҳри ишқ.

ҶОРИҒИНГНИ УНУТМА

Уммонда нажот пойлаб, икки кемани тутма,
Икки қуёни овлаб, ўлжа баҳридан ўтма.

Дўсту-ёр ўртасинда ўз қадрингни улуғ тут,
Овсар доно бўлар деб донни хирмонда кутма.

Ҳар усулда дов солиб, бурдинг кетмасин элда,
Оққа қарони чаплаб, бетга қарони суртма.

Нафсингга бўлсанг ғолиб, кўнгилни роҳати шу.
Умрингни сароб айлаб, беҳуда оғу ютма.

Ҳар бандага ўлчовни бериб қўйган азалдан,
Бир кун келиб хачир ҳам тулпор бўлар деб йўртма.

Сарвари оламини кўр, фақирлар фахри қиёс,
Гар Сулаймон тахтида шоҳсан, гадони туртма.

Ҳижрат, кеча ким эдинг, қаён борлунг гўддайиб,
Зарбоф хирқада бўлсанг, чоригингни унутма.

БАРДОРДА

Халқи Худо турли хулқу атворда,
Таърифига сўз топилмас атторда.

Оқил аён нури раҳмон тафтида,
Жоҳил аён турқи шайтон рафторда.

Оқил билан рўшнолиқ бор йўлингда,
Юкинг қолмас норинг бўлса қаторда.

Жоҳил жонга бало бўлар ёвушсанг,
Теринг шилиб, сомон тиқар бардорда.

Ошиқ эрсанг, ишқ йўлидир жаҳонинг,
Жисми руҳинг ором топар шарорда.

Ризойи руҳ, санойи ишқ, илми ҳол,
Таважжуҳи ул хожаи Аҳрорда.

Ал-фақиру фахри уммат ризоси,
Шул сабабдин аҳли ориф бардорда.

ТИЛ УСТИДА

Барча ғавғойи шўриш. шўр замин бил устида,
Бандаси ғорат қилтур, кўр, обу гил устида.

Афтида мақри зухур, шум ҳаёт босмиш муҳр.
Беқадр ўтмиш умр, мисли кўз мил устида.

Неча дунё эврилиб. неча эл кетди келиб,
Ерда тўфон барқ ўлиб, тошди сув Нил устида.

Заҳри қаттолдир ўзи, мор каби аврар сўзи.
Ҳирс адоватда кўзи, иш кўрар тил устида.

Фикратида шарр-жимо, сайъатида минг зино,
Қисмати мавт ул-фано, билмагай фил устида.

Айланур кўклам-кузак, дилга қил Ҳақни безак.
Кўр, фалакда ойкезак, ўртанур йил устида.

Гарчи Ҳижрат кўл ғаминг, ўчмасин ёққан шаминг,
Бил ғанимат ҳар даминг, ҳар нафас қил устида.

ОҚИБАТ

Бу фалак мулки азал бухрона келмиш оқибат,
Ибтидо-ю-интиҳо Яздона келмиш оқибат.

Жаннатий эрди Одам, тушди талотўм домиға,
Нафсида дўзах ўти, шайтона келмиш оқибат.

Неча бор тоғлар чўкиб, бўлди само ер чоҳида,
Исрофил сурун чалиб, қурбона келмиш оқибат.

Зери по бўлди жаҳон, келмас қарор тавбасиға.
Нуҳ набий қавми ажаб тўфона келмиш оқибат.

Садрида ҳирсу ҳижоб, жоҳил жаҳолат равтани,
Фитнасиндин аҳли эл ларзона келмиш оқибат.

Неки қилди бандаси, олди мукофот ё жазо,
Ажрига қасди бало, меҳмона келмиш оқибат.

Бу қусур маҳшарғача Ҳижрат, қиёматдин нишон,
Шул сабабдин фаноға мастона келмиш оқибат.

КУШОЙИШДАЙ

Фасл ўтди гузоримдан қаро тушдай,
Аср ўтди хира тортган аёз қишдай.

Изни олган исковучдай кунлар ўтди,
Юракларда бахт ифори фаромушлай.

Булут янглиғ само тоқи қарға-қузғун.
Учди кўнгил қизғалдоғи Ҳумо қушдай.

Билмадимки, гирбонимда кимни илки,
Толёимга ҳукм сўқмиш фармойишдай.

Атрофимда турфа нусха, қурт-қумурсқа.
Гирдим олиб қарсак урмиш намойишдай.

Талошларда омон бўлса ғариб бошинг,
Жаҳду ғурбат безак бўлмиш оройишдай.

Неки ўтди, бошдан ўгир, сувга ташла,
Ҳижрат, бари қисматингда кушойишдай.

БЕРАҚОЛМИШ

Наққоши азал ҳуснинга оро берақолмиш,
Қайсари жунун аҳлига ғавго берақолмиш.

Кўклам малаги иффори-ла кўйлаги ял-ял,
Гул хандон отиб, лолага савдо берақолмиш.

Наргисга қаранг, кипригидан равлади пайкон,
Лабларда тутиб рашкига ҳулво берақолмиш.

Булбул оҳ уриб, абри баҳор йиғлади юм-юм,
Ноласи сабаб, ишқиға раъно берақолмиш.

Зангори ғилам алвон ила ерга тўшалмиш,
Сайқалга солиб дунёни, зебо берақолмиш.

Хулкар уялиб меҳробидан маҳлиё боқди,
Ул сарвнoз ила қомати Лайло берақолмиш.

Ҳижратни кўриб, ақволиға кулди-ю гулюз,
Оху қарашу муздига бўсо берақолмиш.

ШАРҚ ТАРОНАСИ

Санъатлар ичинда энг шарқонаси,
Юлдузлар сайлида дур-маржонаси
Регистон кўшкида жон жононаси -
Шарқ таронаси бу, қалб таронаси.

Самарқанд базмида сайқали жаҳон,
Кўнгил меҳробида ишқ - зебигардон,
Мағрибдан Машриққа ястанган уммон -
Шарқ таронаси бу, қалб таронаси.

Аслида ғарб - ғуруб, шарқ эди шафиқ,
Тафаккур аҳлиға Ҳақ берди тавфиқ

Жон ила вужудга куй бўлди рафиқ -
Шарқ таронаси бу, қалб таронаси.

Наволар уйғонар ҳар кошин, гишда,
Навога айланар ҳар жон, ҳар ришга
Қуёшдан куй бўлиб инган фаришта -
Шарқ таронаси бу, қалб таронаси.

Лаъли Бадахшоннинг олтин ҳалқаси,
Соҳибқирон қурган тинчлик қалъаси
Ипак йўли бўлган шарқ машъаласи -
Шарқ таронаси бу, қалб таронаси.

Истибдод янчилди, истиқлол кулди,
Энди Ватан озод, иқболи гулдир.
Ишқи жовидонга куй пайванд бўлди -
Шарқ таронаси бу, қалб таронаси.

Шаънингга ярашар ҳар қанча талқин,
Пойингга гул бўлиб тўшалай халқим,
Юраклар тафтидан порлаган ёлқин -
Шарқ таронаси бу, қалб таронаси.

Дунёда онадай муътабар зот йўқ,
Ватандай муқаддас, файзли ҳаёт йўқ,
Она - Ватан йўқдир - бил, қўшқанот йўқ,
Шарқ таронаси бу, қалб таронаси.

Тарона авжидир шодликдан дарак,
Сени қўшқўлласин Ёсин-Таборақ,
Тўйларга уланган тўйлар муборақ,
Шарқ таронаси бу, қалб таронаси.

ДУО

Аллоҳумма биҳамдика таборак,
Вассалату вассаламу дуодан.
Миналлаҳи таала вал муборак,
Ва хайриҳи ва шарриҳи худодан.

Яратган ҳукмига иқрори банда,
Тириклик зийнати асрори жанда,
Бемаҳал заволу, тухмат-балодан
Илоҳо асрагил, қилма шарманда.

Таъмали ош ема, миннати аён,
Қиёфа алдамчи, чиммати аён,
Ул аҳли китобнинг даъвати аён,
Илоҳо асрагил, қилма шарманда.

Иймондан аълороқ тугал давлат йўқ,
Мол-дунё ҳирсидан кабир ғафлат йўқ,
Охират ҳукмидан ўзга ҳикмат йўқ,
Илоҳо асрагил, қилма шарманда.

Аллоҳумма мағфирли вал валийла,
Муслимин вал муслимат оламида
Насиб қилсин шойистаи жаннатни,
Ато этсин ғариқай раҳматни.

2013 ЙИЛ ТИЛАГИ

Авжланади фалаклар баҳси,
Еру кўкда малаклар рақси.
Ўтган умр тириклик нақши —
Ҳар дил ошиқ, ҳар кўнгил бахши,
Кириб келган янги йил яхши.

Гул косада гулогун гулоб.
Тарозуда гуноҳу савоб —
Ҳар кунингни айлагил тавоб.
Файзли юртга файзли эл яхши,
Кириб келган янги йил яхши.

Ризққа тўла замин ҳовучи,
Жаннатларда ишқнинг овуши.
Бошимизда илоҳа қупи —
Озод Ватан, ҳур манзил яхши,
Кириб келган янги йил яхши.

Рушноликка талпинар ҳар жон.
Эзгу тилак омаддан нишон.
Нурли бўлар эртамин, ишон —
Шу азиз юрт, аҳли дил яхши,
Кириб келган янги йил яхши.

Турланади бу гулкор замон,
Қадам ташла эзгулик томон.
Бошинг тошдан бўлсин, жон омон —
Дилни покла, ният қил яхши,
Кириб келган янги йил яхши.

Мундарижа

Анбарафшоним Ватан.....	3
Калом.....	4
Чумоли.....	4
Сано.....	5
Билдирмайгина.....	6
Тинмас.....	7
Тоза гул.....	8
Ишқи илоҳий.....	8
Мезон.....	9
Тақдир.....	10
Худпараст.....	11
Тавба.....	12
Мўлтонилар.....	12
Нафас.....	13
Жунун манзили.....	15
Мангу ишқ.....	16
Ватан шаъни.....	17
Балдаи маҳфуза.....	18
Улуғ юрт.....	19
Сен баҳорни бошлаб келасан.....	20
Ойбарчиннинг нидоси.....	21
Асқар Маҳкам хотираси.....	22
Фасли ҳамал.....	23
Жангномаи Яҳё.....	24
Шоирларнинг бахшиси.....	25
Ҳамал келди.....	26
Соҳибқирондир Ватан.....	27
Аёл ва баҳор.....	28
Баҳор ташрифи.....	29
Соғиндим.....	30
Зебона.....	31
Шунга шу.....	32

Суҳайло.....	33
Самарқанд мадҳи.....	34
Сорбон Самарқанд.....	34
Билмасин.....	35
Яҳёга айт.....	35
Тасаддуқ.....	36
Фасли ишқ.....	37
Жулдурвақоға.....	37
Сомсадин.....	38
Ойпари.....	38
Бардаки.....	40
Балодур.....	41
Чироқ.....	41
Истаюр.....	42
Соғиндук.....	43
Табиатнинг.....	43
Парласидурмиз.....	44
Мажора.....	45
Маликаи Будур.....	45
Ажаб дунё.....	46
<i>Қолдиму Бобур ғазалига мухаммас.....</i>	46
<i>Яхшилик Бобур ғазалига мухаммас.....</i>	47
<i>Тутай Навоий ғазалига мухаммас.....</i>	48
<i>Мушарраф кун Жомий ғазалига мухаммас.....</i>	49
Туш.....	51
Сўққабош.....	51
Байтал.....	52
Тажанглаб.....	53
Битқазиб.....	53
Султонимиз.....	54
Ғаров.....	54
Зиндага.....	55
Қуён бўлгон.....	56
Ўтдан қўйма.....	56

Ҳаёт ҳикмат.....	57
Чирманда кўп.....	57
Бормағон яхши.....	58
Етишмайди.....	59
Нима ёзар?.....	59
Даъво бўлакча.....	60
Лаганбардор.....	60
Вақтинчалик.....	61
Ичбурмаси.....	61
Ишқал.....	62
Уй можароси.....	63
Шийпон.....	63
Бозингга боз.....	64
Рауф Парфи ёди.....	65
Этакни торт.....	66
Юлдузимни изладим.....	66
Шоирдан не оласан?.....	67
Қисмасин.....	68
Дуруст.....	68
Довдир қилур.....	69
Тарози.....	70
Баракадай.....	70
Фанимат.....	71
Чироқ эрмиш.....	72
Эй гул.....	72
Топилмайдур.....	73
Марҳабо.....	74
Татар қилмиш.....	74
Савдони кўринг.....	75
Отмағунча.....	76
Билмадинг ҳаргиз.....	76
Ўргасинда.....	77
Макр баёни.....	78
Ким бўлдинг?.....	78

Қарздор кўринма.....	79
Закотимда.....	80
Нолима.....	80
Тўфонидан.....	81
Тўнкалар.....	82
Баҳри ишқ.....	83
Чориғингни унутма.....	83
Бардорда.....	84
Тил устида.....	85
Оқибат.....	85
Кушойишдай.....	86
Берақолмиш.....	87
Шарқ гаронаси.....	87
Дуо.....	89
2013 йил тилаги.....	90
Мундарижа.....	91

Адабий-бадиий нашр

Нуруллоҳ Достон
(Н.Остонов)

ФАСЛИ ИШҚ

Муҳаррир - Порсо Ҳошим

Мусаввир дизайнер - Шухрат Мирфаёзов

Мусаҳҳиҳ - Зилола Остонова

Компьютерда саҳифаловчи - Нялуфар Мавлонова

Сураткаш - Тоҳир Норқулов

Нашр. лиц. АИ № 104, 15.07.2008 й. Босмахонага 09. 09. 2012 йилда берилди. Босишга 14.01.2013 рухсат этилди. Қоғоз бичими - 84x108 1/32. Офсет усулида чоп этилди. Босма табағи - 6,0. Адади 3000 нусха. Буюртма № 73. Баҳоси келишилган нарҳда.

• MERIYUS хусусий матбаа-нашриёт корхонасида чоп этилди.
Тошкент шаҳри, генерал Узоқов кўчаси, 2-"в" уй.
Тел: 228-94-11